

लीला सागर

वेष्णु राजदान

किताबि हुन्द मवाद छु रँछरिथ

नाव	लीला सागर
छपन वरी	2000, दोगिम एडिशन 2016
तरतीब कार	कुन्दन भट (राजी)
कमप्यूटर कम्पोजिंग	रोशन लाल भट 'रोशन' वैशाली गाज़्याबाद उ-प्र मोबाइल :-09540497333

कूमथ र.100

पबलिशर

कश्मीर कलचरल ट्रस्ट

471, विनायक नगर, मुड्डी जम्मू

www.kashmirculturaltrust.com

E mail kashmirculturaltrust@gmail.com

Mob. 9868555535

प्रेस: ताज प्रंटिंग सरविस, दिल्ली

कवर फोटू भरगुशेखा भगवति मंदर, मटन, कश्मीर

अर्पन

राजदान साँबुन्यन कोरयन
सुश्री दीवकी, तुलसी, गवरी तु किशानी
तु तसुजि बावजि, शांता जी हंदि नावु

तरतीब

यि एडिशन

ज्ञ कथ मूतीलाल साक्री

ज्ञान रूपकृषण भट

न.	लीला	सफु
1	पादि कमलन तल	
2	चु माता कासतम गम	
3	यि छु संसार सौपनु माया	
4	हा मनु दुशमनु	
5	गरु गरु करुन त्रुवुम नु ज़ाह	
6	नंदन बु करुयो लोलु पोशन मालय	
7	सतु संगुक विकासुय योत	
8	व्वलो टाठि म्हान्यो रोदुथ क्या मलालय	
9	कर क़शण दरशुन मे हावे	
10	शामु लालस वॅन्य दिवान	
11	शामु शामय व्वलो व्वलो	

- 12 सिरियि न्यरमल द्राव लो लो
- 13 चानि बरु तल प्रारुयो
- 14 नंदु गोर्युन आंगुन
- 15 करुन गछि पॉन्य पानस जय
- 16 प्राता काल आव मे ति अन तु गाश मति
- 17 दयालो बोज़ पॅर्ययाद
- 18 ही दयि बोज़ कनय
- 19 अनुग्रेह चानि बेमार बलि लो लो
- 20 शामु वखतन शाम रुठुम
- 21 जीवु सुंद युन गछुन्न कारण वया
- 22 मनन कोरनम पागल मन
- 23 मूरख मनु म्यानि कथ बोज़ख ना
- 24 वाख
- 25 हिंसा फल
- 26 ब्रहमन कन्या
27. वेषु राजदान दयि लोलुक ग्वनमाथ प्रोफ.रतन तलाशी

यि एडिशन

लीला सागरुक दौयिम एडिशन हयथ छि अँस्य परनवालयन ब्रॉठकुन हॉज़िर । असि छे येमि कथिहुंज खोशी ज़ि वेषणु राजदाननिस कलामस बोर परनवालयव वछि वाँजि लोल । लीला सागर छपेयि ग्वडनिचि फिरि सनु २००० ई. मंज तु तिमु सारेय कापियि छे मक्कलेमचु तु वारयह नफर अँस्य असि यि किताब मंगान । येलि यि किताब छपेयि तमि पतु अकी वुहुर्य सपुद काँशिर ज़बॉन्य बापथ नागरी लिपी मंज माणकिकरन (standardisation) तु अँरनिमाल-आकरुती साफटवियर सपुद तयार युस व्वन्य सरि आम सपुदमुत छु तु साँरी वरतावान छि । लेहाज़ा छे यि किताब ति अमी मूजूब ।

चथ एडिशनस मंज कँर असि राजदान साँबुन्य ब्याख अख स्यठहय आम, स्वंदर त मनस प्रयिवुन्य लीला : चु मोजेय कासतम गम, बु लागय बावु कोसम : शाँमिल । असि छु येमि कथिहुन्द एहसास ज़ि वुनि छु राजदान साँबुन वारयाह कलामु अछोप, वारयह कूशिश करेयायि यि हॉसिल करनुच मगर कामयाब सपुदय नु । अँस्य थवव कूशिश जाँरी, तु हरगह कंह अखा ति असि अथ मंज मदथ करि अँस्य रोजव शुक्रगुज़ार ।

अँस्य छि रोशन लाल भट 'रोशन' यिमव यथ दौयमिस अडिशनस चुकि सान कम्पोजिंग वेंकरिथ पनुन बाव होव, स्यठहँय शुक्रगुज़ार । असि छे व्वमेद असि मेलि परनवालयन हुंज आँही तु आशिरवाद तु चथ किताबि मुतलक दिन पनुन्य राय ।

जु कथु

राजदान साँब छु पानय पनुन्य ज्ञान । ज्ञॉन्य हुन्द आगुर ग्यानु ज़ल चेनु
वाँलिस छु नादि बैदुक वनुवुन कनन गछान तु यस नादि बैदुकिस वनुवनिस
जेव तगि दिन्य सु छु अज्ञॉन्य लॉगिथ ज्ञॉन्य हुंजु खिरखंड थाजि बाँगरान ।
युस चेथ स्वख तु सोकून छु यिवान ।पोजय बूजिव बु छुस पानु ख्वहय मस
चेथ जवान गोमुत । दपान काँह तखलीक अगर त्रेन वॅरियन ज़िंदु रोज़ि स्व
छे जान । हरगाह त्रहन वॅरियन ज़िंदु रोज़ि तेलि छे बेहतर । व्वन्य हरगाह
तमि अपोर ति पॅच तेलि छु नु तथ केँह म्वलुवुन । राजदान साँबुन्य बजन छि
पॅत्यम्यव पंचाहव वॅरियव अखतुय अमि खोतु ति ज़्यादु वॅरियव प्यठु छारन
वाल्हन त्रेष होमरावान । तु प्रावन वाल्यन मस करान । काँशिरिस मंज़ बक्ति
बावुचि शाँयिरी हुन्द ज़िकिर रोज़ि तोताम अडुल्योकुय योताम नु राजदान
साँबुन्यन यिथ्यन हिव्यन बजनन हुन्द ज़िकिर सपदि ।

१. पादि कमलन तल बु आसय करनि चॉनी असतुती ।
२. हे दयि बोज़ कनय च़ेय रोस कस वनय ।
३. प्राता काल आव मे ति अनतु गाश मति ।
४. नन्दन बु करयो पोशन मालय लो लो ।

बॅक्ति बावस मंज़ छु नु वेष्णु राजदान ति रुखि नेरनस
खोचान । तस छु प्रथ रंगस तु प्रथ रूपस मंज़ बे रंगुसुन्द जलवु नज़रि
गछान । युस स्वग्वन वाद आँसिथ ति आँखरस प्यठ नेरग्वन वादस ताम
पिलन छु करान । मसलु छु पान प्रजनावनुक, जज़बु सपदनुक तु द्वन कुनुय
करनुक, यथ राजदान साँबन स्वग्वन वादुचि वति पॅकिथ ति युथ ह्युव
नफीस इज़हार छु बखुशमुत ।

रासस अंदर नेथुननि अचव नॅचिथ म्वचव कृष्णय योत
वरि बरि आनन्द करि अथुवासुय सतसंगुकुय वैकासुय बोज़

राज़दान साँब छु नु काँशिरि खाँतरु अब्योद, तस छु पनुन मरतबु। अब्योद
छि अँस्य यिमन नु सु छारुन तोग तु न ज़ानुन तोग। मे छि यि कथ बूज़िथ
अज़ ब्वकृ हुनान ज़ि यिंहज़ि बैक्ति हुन्द मस ज़्यादु लूकन ताम वातनावनु
खाँतरु छि यिहिँद्य बजन छापनुक संज़ सामानु सपदान , दय बूज़िन यि काँम
करन वाल्यन लॅगिन आय तु पाय।

मोती लाल साक़ी

पँटियाला 17 मार्च 1999, नवरेह

जान

वेष्णु राजदान ओस अनन्तनाग ज़िलकिस क्वलगाँम्य तँहसिलस मंज
अँकिस नामावर गामस बुगाँमिस मंज 1890ईसवी मंज ज़ामुत। दपान अँम्य
सुन्द बुङ्ग्य बब गोपाल राजदान ओस मूल तलु सिरीनगरु सफावँदल
रोज़ान। यि वोत नोकरी हुँदिस सिलसिलस मंज ग्वडुन्यथ न्यायुन, युस
संगमस नज़दीख अख गाम छु तु तति प्यठ आव ज़ॉनुपोर। अँथ्य दोरान
सपुद अँम्य सुन्द खांदर बुगामि अँकिस ज़मीनदार गरस मंज। अमिस ज़ाव
अख नेचुव यस नारायण राजदान नाव ओस। मगर नेचुव ज़ेनु पतय गँयि
गोपाल राजदान न्यन बॉचन दून मुचुकरी तु अँम्य त्राँव ज़नान बुगामि तु
नेचुव न्यून पानस स्रुत्य शहर। युथुय नारायण राजदान शुराह वुहुर वोत यि
द्राव माजि हुँदिस तलाशस मंज तु वोत बुगोम। अमि पतु रूद यि अँती।
दपान गोपाल राजदान ति आव पोतुस बेयि बुगोमुय बसुनि।

नारायण राजदानन पोर ल्यूख तु बन्योव पठुवॉर्य। अँमिस आव वेसि खांदर
करनु तु ज़ायस त्रे नैचिव्य। वेष्णु राजदान ओस सारिनय खोतु कूस नेचुव।
यि आव नु स्कूल कँह सोज़नु। अँम्य पोर गरी। अँम्य परि धारमिक किताबु
याने गीता, रामायन तु महाभारत। वीदन हुंज ज़ानकॉरी ति ऑसुस। अँम्य
ऑस कँरीमा ति पँरमुच। यि किताब ऑस तिमन दूहन इन्जील माननु
यिवान। अँमिस आव ल्वकचि वॉसि मंजुय खांदर करनु। यि ओस सादन तु
संतन हुँदिस संगतस मंज ज़्यादु रोज़ान। दपान असुंदि गरि ओस दूहय कांह
नतु कांह साद या संत आसान। अँमिस ओस मेहमान नवॉज़ी हुन्द सख
शोख। यि ओस रोज़ानु पँछ्य यि दँप्य ज़ि ति सोम्बरॉविथ अनान। दपान
तस ओस नु कुन ज़ोन बतु ख्योन पसंद। यि ओस वश्नँव्य।

अँमिस ज़ायि ग्वडु ज़ु नेचिव्य मगर तिम रूद्य नु। तमि पत्तु ज़ायस चोर कोरि। अँम्य कोर सारिनय कोर्यन ल्वकचि वॉसि मंजुय खांदर तु पनुन्य र्यन वॉलिन नखु।

ज़मीनदार खानदानुक आसनु किन्य ऑस अँमिस ज़मीनदोरी हुंज कौफी ज़ानकौरी। यि ओस पानु ति ग्रुस्य कार करान। दपान जँ. मीनदोरी मुतलक अशवरु मशवरु हेनु खौतरु ऑस्य अँमिस निश दूरि दूरि प्यठ लूख यिवान। अँमिस ऑस नु कांह कौम फिकरि खसान। आलछ्यन तु नाबकारन हुंज ऑसुस सख चरान। असुंदिस नावस सुत्य छि कैह माहवरु ति मनसूब। यिमन मंजु “अमर नाथ हावुन” अख मशहूर महावरु छु। दपान नैदु करनु खौतरु ऑस्य अँम्य अकि दूह पनुन्य ज़ु हमसाय बुलौव्यमुत्य। पानु ओसुस कोत ताम गछुन। येलि शामनस गरु वोत यि गव ज़मीनस प्यठ। अति वुछुन तिमव ऑस ज़डुय नखु वॉजमुच। खास कौमा ऑसुख नु कैह कॅरमुच। अँमिस गव बडु अफसूस तु यि थोवुन कानि तलय। वन्य येलि कैचि कौल्य पत्तु अँम्य सुंजु वॉर्य आयि यि गव तिमन पानय सादनि। गनटस खंडस कौम कॅरिथ पुछुन तिमन मंजु अँकिस बौयिस, तला वन अमरनाथ कपौर्य छु? तँम्य होवुस ऑगजि सुत्य अँकिस तरफस कुन। पत्तु पुछुन बेयिस बौयिस तँम्य होवुस ब्याख तरफ। यि वोथुख ति किथु बनि ज़ि अमरनाथ आसि यपौर्य ति तु हुपौर्य ति। तोह्य कॅरिव पानुवॉन्य फौसलु ज़ि कुस छु सँही। दपान दूशवय बौय खँत्य खाहु मंजु बोठ तु लौजिख अख अँकिस सुत्य द्रौज द्रौज करुन्य। यि ओस मंजु अँक्य सुन्द तरफ करान तु मंजु बेय्य सुन्द। यिथु कन्य रूद्य तिम दोह्य दोहस सिरिफ बहस करान तु यि रूद तमाशि वुछान। थँकिथ फुटिथ येलि यिम शामन गरु वौत्य अदु तोर यिमन फिकरि ज़ि वेष्णु राजदानन हूर तिमन आँच। यिथु कन्य गव “अमर नाथ हावुन” मोशूर तु वुन्युकताम ति येलि कांह कौसि ज़ौनिथ मॉनिथ गँगलि लागि अँस्य छि वनान यि छु अमरनाथ हावान।

वेष्णु राजदान ओस चाटु गोर ति वाराह । दपान यि ओस अकि दूह कथ
ताम अलाकस गोमुत अति लॅज अॅमिस राथ यि न्युव अॅक्य मॅर्यद्यादुम्य पनुन गरु । बे
मोकृ पोछ बुछिथ खॅच खानदारिनि नस । खॉर दपान युथुय खानदारिनि शामन बतु
शेरुन ह्योत, अमि फ्युर अॅक्यसुय थालस । राजदान ओस चोकस नज़दीख बिहिथ । यि
गव हॉरान जि खेनु वॉल्य छि ज़ु मगर थाल छु अकोय । युथुय खानदारिनि
बतु शूर तमि पिलुनोव यि नेचिविस कुन तु वोनुनस दिबा मॉलिस । राजदानन
वोनुस व्वलुबा गोबर्बा बु पिलुनावस तु रोटुन बतु थाल तु ह्योतुन ख्योन ।
दपान खानदारैन्य गॅयि रुसवा ज़दु हिश रुज़िथ ।

वेष्णु राजदान ओस कर्म यूगी । ग्रहस्थ आश्रमस मंज़ रुज़िथ तु
सॉरुय दुनियादॉरी जिमुवॉरी सान निबावान ति रुद यि दयि सुन्द नाव
स्वरान तु दरुम करुम करान । अॅमिस ओस नु पनुन तु परुद ब्योन-ब्योन
बासान । यि ओस सारिनुय इनसानन बराबर लोल बॉगरावान तु खॅदमति
खलुख ओस पनुन करतव्य ज्ञानान । दपान अॅम्य गुज़ोर वारयाह वख
मारतडुं यथ अज़ कल मटन छि वनान, बरगुशेखा भगवती हुंघन चरनन
तल । अति छे पांडव लरि । अति ओस सादन संतन हुंज़ सेवा करान । दपान
अॅमिस आयि अॅती वयखूरी तु हैतिन बजन लेखनुय । ज़्यादु तर कलाम छु
अॅम्य अॅती वोनुमुत । अति ओस दूह राथ बगवान नावस सुत्य लीन रुज़िथ
संत सेवा करान । अॅम्य ओस पनुन पान यि दॅप्य जि ति बगवान नावस अर्पन
कोरमुत । दपान यि ओस अति सरपन अथस क्यथ दूद चावान । यि ओस
अति सत संग करान तु नज़दीक गामन हुंघ लुख ऑस्य अॅमिस निश
लगातार पॉठ्य यिवान गछान । अॅमिस ऑस्य अति कॅह शैश्य ति बनेमुत्य ।

दपान 1953ईसवी मंज़ येलि शेख अबदुला गिरिफतार करनु
आव , वॅशीरि मंज़ वॅछ वारयाहन जायन अफरातफरी । यि द्राव पनुनिस
हमकाल तु नवजवान शॉयिर प्रेम नाथ कौल अर्पन सॉबस सुत्य लूकन बॉय

बरादरी तु अमनो अमान कॉइम थवनु खॉतरु समजावनि । तमि वखतुक
अँम्य सुन्द मशहूर शार छुः-

अहलि खलकव अख नसीहथ बूज्यतव

पासि खु वदा साँरी यिकुवटु रूज्यतव

अमि पतु सिरिफ अकी वुहुर्य याने 1954 ईसवी मंजु श्रावनु जून पछु आँठुम
दुहु गव यि पायि बोडु ग्वनमाथ स्वर्गवास । बकौलि प्रेम नाथ कौल अर्पन यिम
जन यिमन हमेशिक्य पॉठ्य तमि विजि ति लरि लोर बिहिथ आँस्य आँस
राजदान साँबन बतु ख्यथ गरि काँनी प्यठ लर हिश त्रॉवमुचु । यि गव
यकदम थोद वँथिथ तु ब्यूठ च़ाटु कोठ कॅरिथ प्रानायम करनि तु अँथ्य
सुत्य कोरुन प्राण त्याग ।

कलामि राजदान

अख बॅड बदकुसमती छे जि राजदान साँब ओस नु आम पॉठ्य
पानु लेखान । दपान यि ओस अकसर ज़बॉन्य वनान, लूख आँस्य बोज़ान,
याद करान तु लेखान । अंदि अथुक छु सिरिफ अख परचि मे दँस्ययाब
सपुदमुत । सिरिफ छे असुंजु ज़ु ज़ेछि नज़मु हमसाफल तु ब्रहमनकन्या,
हमसाफल नावु किताबि मंजु. छपेमचु । अँम्य सुन्द ज़्यादु तर कलामु छु
पंडित र्वगनाथ कौलन युस ज़ॉनुपोरु रोज़ान ओस तु बुगामि अँकिस थोक
दुकानदारस निश गुमाशतु ओस कलम बंद कोरमुत । ल्याहज़ा रूद नु अँम्य
सुन्द कलामु यकजा सोम्बरिथ । यि गव वरक़ु वरक़ु । अँम्य सुंजव कोर्यव
खास कर बजि हिशि कोरि दीवकी जी तु अँम्य सुंजि बावज़ि शाँता जी छु
अँम्य सुन्द वारयाह कलामु ज़बॉन्य याद । येमि किताबि हुन्द वारयाह हिसु छु
असि यिमन दुशवुन्य बेन्यन निश कलम बंद कोरमुत । दपान येलि ति कुनि

सातु राजदान साँबस वुजुन्य यियिहे,सु ओस शांता जी आलव दिवान,तमि पतु ओस अँछ बंद वँरिथ बेहान तु वनान,तु शांता जी आँस याद थवान त, अथ ताँलीम ताँलीम करान । अँस्य छि यिमन दूशवुन्य बेन्यन हुँद्य दिली शुकरगुजार ।

वेषणु राजदानुन कलाम परन वाल्यन ताम वातुनाँविथ छु मे बासान ज़न तु मे प्यँतरु ऋण नखु वॉल्य । हालाँकि मे ओस वारयाह वखतु प्यठु यि काँम सरअंजाम दिनुक होल, मगर अथ कामि वोथ तमि विज़ि दस येलि लग बग अख वरी ब्रोह दिलि हुँदिस सिरीफोर्ट हालस मंज़ “पनुन कश्मीरुक” जलसु सपुद तु अथ मंज़ बोजुनाँव अँक्य कलाकारन वेषणु राजदानुन्य लीला मगर लेखुत द्युतनस नु कैह । म्यानि आशिन राजन होर ओश तु दोपुन यि छि शरमि हुँज़ कथ जि यस ग्वनमातस पँर्यमुत्य लीख्यमुत्य तु आसन बासन वॉल्य जुऱय आसन सु ग्वनमात गोछा यिथु कन्य मँशरावनु युन । अमि कथि दिच मे तँहरीक तु असि तुल यथ कामि दस । असि वँर राजदान साँबुन तमाम कलामु यकजा करनुच वारयाह कूशिश , मगर कामयाब गँयि नु । वारयाह कलामु छु छलु छांगरि गोमुत तु मँशरावनु आमुत । खॉर यि कैँछा ति मुमकिन सपुद ति छु तुँहदिस खँदमतस मंज़ पेश । यिँहदिस कलामस छि चोर हिसु । लीला, ज़ेछि नज़मु, वचन तु बाँथ तु मज़ाहिया शाँयिरी । असि छे व्वमेद जि यि कलामु खसि परन वाल्यन टारि तु तिम दिन अथ दाद । कलामस प्यठ तशरिह करुन्य छु नु म्योन मकसद अलबतु वनु ज़ौरुऱ जि वेषणु राजदानुन कलामु छु नु परमानन्द नि तु कृष्ण जुव राजदान नि कलामु खोतु कम पायि कैह ।

अँस्य छि श्री मोती लाल साक्री साँबुन्य सेठहुय शुकरगुजार यिमव यथ कलामस मुतलक़ “ज़ु कथु” लेछि । सुती छु येमि कथि हुन्द

अफसूस ज़ि बे मोक़ु मोतन द्युत नु तिमन यि दूह वुछनु । डा० रतन तलाशी
साँबुन्य ति छि अँस्य मश्कूर यिमव राजदान साँब निस कलामस म्वल
_ आँकवन वँर । श्री जवाहिर कोसम साँबन वँर बडु सबरु तु मेहनतुसान
नसतालीकचि किताबि ख्वशानवीसी, अँस्य छि तिहिंद्य ति शुक्रगुज़ार ।

रूपकृष्ण भट

श्रावणु ज़ून पछ आँठम

19 अगस्त, 1999

पादि कमलन तल

पादि कमलन तल बु आसय	करनि चॉनी असत्वती
मूक्ष दिम बोड़ वर्गु दिम	ही बर्गशेखा भगवती ।।
गोम न्यँतरन खून जॉरी	छुस च़े कुन ज़ॉरी करान
बास प्रेत्यक्ष व्वन्य कास खॉरि	अँस्य छि पापव वँल्यमती ।।
चानि आशायि योत बु आसय	नाव्वमेद नेरय नु ज़ांह
या मे वर दिम मूक्ष दामुक	नतु छुसय प्रारान येती ।।
लोलु बाग़स पोश फोल्यमुत्य	वेरि चाने च़ॉर्य च़ॉर्य
शेरि लागय बावु कोसम	शोलुवुन्य कारेपती ।।
कया वनय अँस्य मंदुछेमुत्य	चंदु छेन्य सोदा करान
कर दया व्वन्य वुछ मु तथ कुन	शरमि सुत्य अँस्य गँल्यमती ।।
चॉन्य ग्वन वेसतारनुक ताक़थ	अनी कुस कस वनी
छुय च़े जय जय शामु स्वंदरी	जामु शूबान छी छेती ।।
ग्यानु दाता मूक्ष दाता	छेख ज़गत माता चु छख
ही भवॉनी कर मे वॉनी	स्यद म्वखस दिम सरस्वती ।।
पज़ि मनु युस बँक्ति चॉनी	करि निश्कल राथ द्यन
क्या छु संशय तसुंदि बापथ	मूक्ष दामुक्य बर वँथी ।।
चॉन्य ग्वन छुस बो वेच़ारान	पन ओमुक्य खारान बु छुस

अबसनकय वर दल कुनुय कर	नतु छु आछुर वॅक्य वॅकती । ।
सर्व व्यापख छेख च्वपॉरी	अॅस्य छि शॉरी क्या वुछव
व्वन्य च़े रोस कुस बोज़ि ज़ॉरी	हाव म्वख पेटच परबॅती ।।
कर्म हीनन दरमु हीनन	कर्तव्यन सान्यन मु वुछ
डाल स्योद अथु कर्म लॉनिस	प्रक्रमस चॉनिस खॅती ।।
वीलु ज़ॉरी बोज़ 'वेष्णस'	रोज़ संतुष्ट सर्वदा
छेख चु रोशन छुस बु तोशन	चुय मे बखशख थॅज़ गॅती ।।
पादि कमलन तल बु आसय	करनि चॉनी असत्त्वती
मूक्ष दिम बोड़ वर्गु दिम	ही बर्गुशेखा भगवती ।।

○○○○○○○

चु माता कासतम गम

चु माता कासतम गम	बु लागय भावु कोसम
दितम दर्शुन चलयम गम	बु लागय भावु कोसम ।।
मे माँजी आश चॉन्य छम	बु लागय भावु कोसम ।।
दया दृष्टि मे करतम	बु लागय भावु कोसम ।।
बु मा वोतुस च़े निश ज़ांह	मे कॅरमय नु पाठ पूजाह
तवय शरमंदगी मे छम	बु लागय भावु कोसम ।।
चु. दीवी क्याज़ि रूठुख	खॅटिथ कथ जायि बीठुख
दितम दर्शुन चलयम गम.	बु लागय भावु कोसम ।।
ग्वडन्य स्यद कर मे वॉनी	दोयिम दिम पॉर्यज़ॉनी
त्रैयिम त्रैयलूकि मंज़ सम	बु लागय भावु कोसम ।।
कोरुथ च्वन वीदनय अंद	छु पुंचिम परमु आनंद
शेयिम शिव रूप, बासतम	बु लागय भावु कोसम ।।
सॅतिम बासतम मे सतरूप	दज़्यम अँदरु ग्यानुक दुप
च़े डींशिथ दूर च़लि यम	बु लागय भावु कोसम ।।
दज़ान छुय दूप कोफूर	वज़ान छुय साज़ संतूर
नगारो साज़ मदहम	बु लागय भावु कोसम ।।
यिवान छिय त्रेश्य इत्यादेक	करान दर्शुन छि सन्वख
बेदर रुज़िथ छि सरखम	बु लागय भावु कोसम ।।
नेथुर चॉन् य पदमु वॅथुर	कलस प्यठ म्वखतु छॅथुर
छु तथ निर्वाणुक थम	बु लागय भावु कोसम ।।

चु अष्टा दशब्ज्जा छख	मे तेय भोगा चु सोऽहख
चे दीवी क्या गछी कम	बु लागय भावु कोसम ।।
छु बोड दरबार चोनुय	वंदहय कबीलु क्रोनुय
शोलु मारान छु व्यलकम	बु लागय भावु कोसम ।।
वेंहरिथ छु मायायि ज़ाल	मूहन मे वोलमुत नाल
अम्युक व्यस्तार बनतम	बु लागय भावु कोसम ।।
नचान छी चंड तय मंड	तिमन दितु पानय दंड
प्यठय त्रावुख निरालम	बु लागय भावु कोसम ।।
चु छख शक्ति शिवस सुत्य	छे यिछ अँगनस अंदर ज्यूत्य
तम्युक मंत्र छु शम दम	बु लागय भावु कोसम ।।
छु ऑठम दूह चोनुय	बोऽि फॅर्ययाद म्योनुय
मे सायस तल चु रछतम	बु लागय भावु कोसम ।।
वनान छुय वेष्णु राजदान	चु मॉजय छख दया वान
दया दृष्टि मे करतम	बु लागय भावु कोसम ।।
मे मॉजी आश चॉन्य छम	बु लागय भावु कोसम ।।
दितम दर्शुन चल्म गम	बु लागय भावु कोसम ।।

○○○○○○○

यि छु संसार सोपनु माया

यि छु संसार सोपनु माया	मा छु नेरान सोरये
ज्योन तु मरुन युन तु गछुन	अतु गथ ओरु योरये ॥
त्रुय तु संतान छी चे बासान	हमदरुद गमखार बोज़
यावनस मंज़ छ्वह छि द्यावान	मतलबुक परिवार बोज़ ॥
दूख छि रावन्य दूख छि प्रावन्य	दूख छु अमिकुय सार बोज़
दिह्य त्यागु विज़ि सूत्य मा दिनम	प्रोन काँगरि खोर ये ॥
वृद अवस्था येलि छि यिवान	तेलि दिवान दकु दौल्यये ।
शुर्य शुर्यन पनुन्यन वनान	ओस फौतिर मोलये ॥
बचपनस मंज़ अँम्य बोरमुत	छुनु जांह असि लोलये
व्वन्य दपव लाचार आसिहे	ओस आसन वोलये ॥
छुन नु ज़नमस ज़ांह ति कोरमुत	काँसि सूती वोरये
त्रेश योदवय योरु मंगुहाख	ज़ोरु आलव मा खसान ॥
ज़ोर सूरिथ ज़ोरु फोरि मा	तोरु फीरिथ छिम असान
कव्ठि प्योमुत शोर करिहे	कुस करस्स तथ गोरये ॥
ज़ामतुर्य छि पामु सोज़ान	बोज़नावान छी लुकन
ज़ांह ति कोरुना खूब साला	आसुहव वुनि सुय थेकान ॥
कोरि वातन वॉरिव्यव प्यठु	ज़ोरु लायन बाख बोज़
असि किथव कन्य च़ोलुख त्रॉविथ	राज़ु येंदरु काख बोज़

बाकि अंदर बोझनावन	कोताह बोड ओस काख
यश हावान ख्वश छि गछान	बूझिथ मँझिम्य यॉर्यये ।।
बस छि ख्यावुन्य साल तिथी	युथ नु म्यादस वठ गछ्यख
यश करुन छु कठ छि मारुन्य	खश गछ्यख या फ्रठ गछ्यख
चाय तलखुय गछि चावुन्य	साल ख्यथ यिनु सेठ गछ्यख
ताजु गरुम वाजुवानाह	ऑस्य बाँगरान गोरये ।।
यि छु संसार ब्रम तु बाँज्यगार	सुत्य काँह कैह छा निवान
मूर्खन छिय बोझनावान	बोझु नाँविथ पछ अनान
ख्वठ वेचारव कटु मारव	सुत्य मुक्ति छा लबान
क्रतु वेद वँर काख बेशख	स्वर्गु मंडलस खोरये ।।
कर तु वेचार कथ बकार छुय	परिवारुक यश च़ेय
यी च़े येति कोरमुत आस्यथ	ती यिथी दरपेश च़ेय
चित्र गुप्तन आसि ल्यूखमुत	तथ गछ्या कम पेश कैह
राजदानस ग्यानुवानस	शेर खानस छा हिशर
अल्पब्वजु किन्य युथ नु खारख	पाँन्य पानस बोरये ।।
यि छु संसार सोपनु माया	मा छु नेरान सोरये ।।

हा मनु दुश्मनु

हा मनु दुश्मनु

हा मनु लो लो हा मनु लो लो ॥

मनु कति आयोख कस निश पॉदु गोख

कस माजि प्योख थनु

हा मनु लो लो हा मनु लो लो ॥

चु नु ज़ांह ब्रेम्योख बुय ब्रमरोवथस

ह्योतुथम शनु शनु

हा मनु लो लो हा मनु लो लो ॥

हरदुनि वावय लोगथस दावस

कोरथस पनु पनु

हा मनु लो लो हा मनु लो लो ॥

संतोश छुय नु ज़ाँह फेरनुक छुय प्राह

फेरान वनु वनु

हा मनु लो लो हा मनु लो लो ॥

अथ शूबि दित्तुकार यथ गेलि संसार

चानि गोशिरावनु

हा मनु लो लो हा मनु लो लो ॥

रामुय गछुहाख रामुय स्वरुहाख

रामुनि रावनु

हा मनु लो लो हा मनु लो लो ॥

स्व ति मंदुछॉवथन अफसूस ख्यॉवथन

तोमलु फलि द्राख कनु

हा मनु लो लो हा मनु लो लो ॥

न्यूथम छलु छलु कोरथस पागल

व्यचारुक दनु

हा मनु लो लो हा मनु लो लो ॥

वेष्णु दास वनि येलि मंज्र कैह कैह सनि

म्यानि समजावनु

हा मनु लो लो हा मनु लो लो ॥

हा मनु दुश्मनु हा मनु लो लो हा मनु लो लो ॥

००००००००

गरु गरु करुन त्रोवुम नु

हरु हरु करुन क्याज़ि मॅशरोवुम

गरु गरु करुन त्रोवुम नु ज़ंह ।।

कथ क्युत यि दिह्य अभिमान बॅडरोवुम

शुमशान वान अथ होवुम नु ज़ाँह

द्वद तु साबनि सुत्य मलुनोवुम

गरु गरु करुन त्रोवुम नु ज़ंह ।।

आलुछ्य पनुन्य मॅजल दूररोवुम

यॅतनुक क्कदम हरुरोवुम नु ज़ाँह

येति कृत्तिकर्मन बोर गोबरोवुम

गरु गरु करुन त्रोवुम नु ज़ंह ।।

द्वद शुर्य संद्य पाँठ्य ख्योवुम चोवुम

ख्योवुम तु त्रप्ति आयस नु ज़ाँह

मनुशील आँसिथ पान मंदुछोवुम

गरु गरु करुन त्रोवुम नु ज़ंह ।।

पनुनुय पान कोनु पानु प्रज़ुनोवुम

चेतुकुय चोंग प्रज़ुलोवुम नु ज़ाँह

नादान संघ पॉठ्य नख्रु शुर रोवुम
गरु गरु करुन त्रोवुम नु ज़ंह ।।

योवनन सोंथा पूरेय बासनोवुम
प्वह पन हरुन वेचोरुम नु ज़ाँह
तावनुन हरदु वाव याद कोनु पोवुम
गरु गरु करुन त्रोवुम नु ज़ंह ।।

दिलुकुय शिल लूकन फॉलोवुम
रोटुम तु चोटुम खोटुम नु ज़ाँह
फीर्य फीर्य बाज़रन मंज़ थेकनोवुम
गरु गरु करुन त्रोवुम नु ज़ंह ।।

परिवारच वृथ गरि गरि थॉवुम
तोरुच पछ देरुरॉवुम नु ज़ाँह
वेषण दास कोनु खास नॅनुरोवुम
गरु गरु करुन त्रोवुम नु ज़ंह ।।

○○○○○○○

नंदन बु करुयो लोलु पोशन मालय

जुजगत पालो तनु ओसुख सनतान वैदान

नंदन बु करुयो लोलु पोशन मालय लोलो

सारँगु स्वरु सुत्य येलि ओसुख मुरली वायान

दिल चूरि निवान ओसुख गूर्य बायन

कूत ओसुय च़े गूर्य बालकन हुन्द प्रेम बंदन

नंदन बु करुयो लोलु पोशन मालय लो लो ॥

दुदु चूर करुने येलि बालकन सुत्य ओसुख फेरान

बैक्ति बावय पोश वथरॉविथ ओसुख नेरान

थनि प्यालु शेरान प्रेम बावु ऑस्य गुरुस मंदान

नंदन बु करुयो लोलु पोशन मालय लो लो ॥

गूर्य बालकन सुत्य कामदीनन रछनि ओसुख नेरान

अग्यॉन्य लॉगिथ कोचि कोचि ओसुख फेरान

नख्रु नख्रु रूजिथ पानुवॉनी पेंदि ऑस्य गिंदन

नंदन बु करुयो लोलु पोशन मालय लो लो ॥

शवदर ब्रहमन आव कनसस ख्वश करनु बापथ

नशि वोथुस सोरुय कथ करनुक रूदुस नु ताकथ

जैव मूलु केंडनस दूद मोथनस प्राचन तु दंदन

नंदन बु करुयो लोलु पोशन मालय लो लो ॥

जसदायि वुछ ब्रहमन पथर प्योमुत वेसमर गोमुत

दितकार कोरनस दूद क्याजि च़े चूरि छुथ थोवमुत

अथु ओस गिलवान कथ करिहे केंह छुस नु अंदन

नंदन बु करुयो लोलु पोशन मालय लो लो ॥

व्वठ च़े लॉयिथ मंजलिस मंज बेयि वापस

गोर प्यव पथर थोद व्वथनुक रूदुस नु ताकथ

वन कुस वतिय ही बगवानु चान्यन फंदन

नंदन बु करुयो लोलु पोशन मालय लो लो ॥

क्वबज़ायि कोब चोल येलि तस प्यठ दया वॅरुथ
दनबाग्य शूब्यस मान बड्योस पानस च़े वॅरुथ
फोल दिल तॅम्य सुन्द होल गॅडिथ मोलनय च़े चंदन
नंदन बु करुयो लोलु पोशन मालय लो लो ॥

क्वबज़ायि निश द्राख कनसुनि डेडि च़ु च़ाख
य्वदस आयि पहलवान तिम ति च़े छुनिथख मॉरिथ
कॅह मूद्य कॅह रूद्य कॅह वॉत्य च़ॅलिथ लंदन
नंदन बु करुयो लोलु पोशन मालय लो लो ॥

कंसास्वर येलि मूद जय जय कार कोरुय प्रज़ाये
दीवी तु दिवता पोशि वर्शुन करने आये
रेश्य जूय सॅन्ययॉस्य बेयि ब्रहमन कृष्णस छि गिंदन
नंदन बु करुयो लोलु पोशन मालय लो लो ॥

स्वदामु सिर्य म्वठ ह्यथ चै निश ओसुय आमुत
छ्योनमुत तु फुटमुत हालु पनुनिय गरि ओस द्रामुत
मोत चै लोगुथ म्वठ चै दिचुथस चंदन तु जंदन
नंदन बु करुयो लोलु पोशन मालय लो लो ॥

अथु पटुरानि अख अँकिस कुन आसय हावान
स्वदामु ब्रहमुन बगवानस क्या छुय ख्यावान
हेडान तु गेलान पानुवॉन्य वेष्णस ति वैदन
नंदन बु करुयो लोलु पोशन मालय लो लो ॥

त्रुजगत पालो तनु ओसुख संतान वैदन
नंदन बु करुयो लोलु पोशन मालय लो लो ॥

○○○○○○

सतु संगकुय विकासुय योत

राधा तु कृष्ण खेलान छि रासुय

सतुसंगकुय विकासुय योत ।।

यियिवे सँखियव सारेय गछव

गँछिथ नचव खेलव रास

सुय गव ज़फ तफ सुय अब्यासुय

सतुसंगकुय विकासुय योत ।।

सारेय समव खासुय खासुय

आमस तु खासस चलि बेद बाव

सुय गव बावुक यूग यखलासुय

सतुसंगकुय विकासुय योत ।।

रासस अंदर नेथुननि अचव

नँचिथ म्वचव कृष्णुय योत

वरि बरि आनंद करि अथुवासुय

सतुसंगकुय विकासुय योत ।।

वुछतव कृष्णस म्वखतय मालय
लक्ष्मी छे आमृच प्यालय हेथ
कस आसि अँम्यसुन्द ह्युव विश्वासुय
सतुसंगुकुय विकासुय योत ।।

असि मंज बनि येलि युथ विश्वासुय
तेलि कस छु मरुन तु कस छु ज्योन
द्वख दोद बलि चलि कालुन त्रासुय
सतुसंगुकुय विकासुय योत ।।

अरजन दीवस वोनून इतिहासुय
अँबीदु बँखती हेछि नोवनय
रण भूमि मंज द्राव सँन्य यासुय
सतुसंगुकुय विकासुय योत ।।

स्वदामु भावनायि सुत्युय येलि आसुय
सिर्य म्वठ वुछिथ ओस मंदुछान
ख्यव श्री कृष्णन कोरुन वेलासुय
सतुसंगुकुय विकासुय योत ।।

बाल ब्रमचौर्य ओस खेलु बेयि कर्यन

गूपी वर्यन वुछ कौंचाह

अख हथ ऑठ बेयि शुराह सासुय

सतसंगुकुय विकासुय योत ।।

युथ आसि रचना त्युथ आसि रासुय

तँथ्य जायि वखतुक हरशुक थान

पशि क्याज़ि पशि कोनु वेष्णो दासुय

सतसंगुकुय विकासुय योत ।।

.....

व्वलो टाठि म्यान्यो रोदुथ क्या मलालय

खँटिथ क्याजि ब्यूतुख चँटिथ म्यॉन्य मालय

व्वलो टाठि म्यान्यो रोदुथ क्या मलालय ।।

मे त्रुयि बावु ब्वद हीतन म्यान्यन च़े ज़ोगुथ

च़े रूदुय नु इनसाफ बे आर लोगुथ

दोपुथ मा कुनी ज़ँन्य करन कस हवालय

व्वलो टाठि म्यान्यो रोदुथ क्या मलालय ।।

बु येलि गूर्य कोर्यन निश गछु कुनी ज़ँन्य

वनख क्या पनुन हाल पेयम मा मे मंदुछुन

मरुन ओस पौज़ तय मरय मा अकालय

व्वलो टाठि म्यान्यो रोदुथ क्या मलालय ।।

बबस माजि पेट्च प्रेम चाने बु द्रायस

गँयाम कर मे अभिमान नखस कर खचायस

थचायस तु शरमंदु गँयस पनुनि हालय

व्वलो टाठि म्यान्यो रोदुथ क्या मलालय ।।

सु मुरली शब्द बैयि गछ्छयम ना कनन मंज
बालु बावु पॉठ्यन खेलव वनन मंज
चु वनतम मे गूपी बु वनुहय गवालय
व्वलो टाठि म्यान्यो रोदुथ क्या मलालय ।।

चॉटिथ शरमि हुंघ परदु द्रायस पतय च़ेय
हयो टाठि म्याने पायस पेता चुय
कलस प्यठ थव्योम चानि प्रेमुक दुशालय
व्वलो टाठि म्यान्यो रोदुथ क्या मलालय ।।

छुथम वादु कोरमुत करय नु जुदॉई
ति सूंचिथ च़े पथ वॅरुम जान फिदॉई
च़े पथ करु गदॉई पनुन्य वादु पालय
व्वलो टाठि म्यान्यो रोदुथ क्या मलालय ।।

यि लोलुच तबुर छेम दिलस छेस बु ऑजिज़
सबुर छुम नु हरगिज़ खबर हेन्य छे जॉयिज़
यि छ्वकलद गोमुत दिल करन कस हवालय
व्वलो टाठि म्यान्यो रोदुथ क्या मलालय ।।

मे तन मन अर्पन कर्याव बालु बावस
गछान येति ख्यनस छ्यन करान छुख च्चु ग्रावय
यि वनतम बँडिथ वँह्य यि दूर्यर बु च़ालय
व्वलो टाठि म्यान्यो रोटुथ क्या मलालय ।।

लगय पादि कमलन लगय बालु बावस
लगय दीवकी नंदनो सथ स्वबावस
लगय कृष्णु नावस लगय नंदु लालय
व्वलो टाठि म्यान्यो रोटुथ क्या मलालय ।।

वेषु दास बावय करान च़ॉन्य बँखती
प्रेमु बावु तफ ज़फ प्रेम भावु म्वखती
प्रेमु सान येति हो बरय प्रेम प्यालय
व्वलो टाठि म्यान्यो रोटुथ क्या मलालय ।।

००००००

कर कृष्ण दर्शुन मे हावे

कर कृष्ण दर्शुन मे हावे बोऒु नावे बनसॅरी
लोलु बुलबुल लंजि बेहिना छवंजि दर्शुन हाविना
ही तु मसवल बाग़ छावे बोऒु नावे बनसॅरी ।।

पाफ कया छुम दूर कोरथस सूर कोरथम दिल दोदुम
शर च़ल्यम कर सना बुलावे बोऒु नावे बनसॅरी ।।

मोह अंदुकारस जाव्यम पानुसुय सुत्य खेलु रास
पॉन्य पानय स्वख मनावे बोऒु नावे बनसॅरी ।।

वनतु कमि कथि दूर त्राव्यम असि थव्यन पामु च़ोल
ग्यानु दीप कर सना ज़ाले बोऒुनावे बनसॅरी ।।

टोठ वेष्णस वलु वॅल्य वॅल्य गूपियन हुन्द होल छुम
ग्यानु अमरेथ दाम चावे बोऒुनावे बनसॅरी ।।
कर कृष्ण दर्शुन मे हावे बोऒुनावे बनसॅरी ।।

शामु लालस वॅन्य दिवान

छेस बु शामा अॅथ्य खयालस

शामु लालस वॅन्य दिवान ।।

छेस बु लॅजमुच्च इन्तिज़ारस राथ द्यन छेस यी यछान
दियि मे दर्शुन यियि मे सालस शामु लालस वॅन्य दिवान ।।

छेस बु राधा ग्रायि मारान मायि सुत्य छेस छूवह दिवान
भावुनाये फिरहस बु थालस शामु लालस वॅन्य दिवान ।।

नेरमल करुम मनुकुय मंदर आसन करस तॅथ्य अंदर
बोज़ हेरि खारन बॅगलस शामु लालस वॅन्य दिवान ।।

वश बु कॅरनस पशि कोताह दूर त्रॉविथ चोल कर्पोर्य
अशि वानि सॅहलाब वालस शामु लालस वॅन्य दिवान ।।

पानु दयो बोजुम कनव च़ेय रोस कस हाल वनय
कुस वुछम अॅदीन बावस शामु लालस वॅन्य दिवान ।।

वेष्णु आसय आशायि सुत्य माशय मॉरिथ मो च़लुम
थफ करय बो ज़ोरु नालस शामु लालस वॅन्य दिवान ।।

शामु शामय व्वलो व्वलो

शामायि हुंदि गुलि सौंबुलो

शामु शामय व्वलो व्वलो ।।

दितु दर्शुन म्यॉन्य द्रुय छेय पोशि वारि म्यानि छावुन्य ही छेय

डालु मारान व्वलु बुलबुलो शामु शामय व्वलो व्वलो ।।

म्वनि वंदुयो पम्पोश पादन दितु दर्शुन छम चॉन्य लादन

लॉन्य न्यायस व्वन्य कोत चलो शामु शामय व्वलो व्वलो ।।

लोलु तीरन सीनु मे दोरुय तनु प्यठु कर दम संदोरुम

छवकु लद छेस व्वन्य कति बलो शामु शामय व्वलो व्वलो ।।

दितु दर्शुन यावन चूरो ट्वफ दिचथम कालु बोम्बूरो

बरु वॅरथस यॅम्बरजलो शामु शामय व्वलो व्वलो ।।

वेरि चानि छेस पान पॉरॉविथ लोलु पलंग थवय वाहरॉविथ

छेम नु यिवान न्येंदरि ज्वलो शामु शामय व्वलो व्वलो ।।

नूरु मति म्यानि चूरि दितु दर्शुन लोलु पोशन करय वर्शुन

गुलि रोयस खाख नतु मलो शामु शामय व्वलो व्वलो ।।

सिरियि नेरमल द्राव लो लो

चोले कठकोश वाव लो लो सिरियि नेरमल द्राव लो लो ।।

शीन चोल पोशि बागन मंज टेकबटन्यव ह्योत करुन संज
बुलबुलव बोर चाव लो लो सिरियि नेरमल द्राव लो लो ।।

अनुबवु ज़लु ग्वडु करु बु श्रान प्रावु आनन्द पर्म स्थान
यूग वानि तन नावु लो लो सिरियि नेरमल द्राव लो लो ।।

वेचारन मलु बो साबन मल च़लि गछि न्यरमल मन
मन बनि पोशि नूल यावु लो लो सिरि न्यरमल द्राव लो लो

दम दिथ वसु ज़लुसुय तल येमि सुत्य फवलि पम्पोश डल
रोशि रोशि पोश छावु लो लो सिरियि नेरमल द्राव लो लो ।।

त्रेशिनायि हुंज़ि नीलु क्राशे लागु संतोश वालु वाशे
दॉयिरुचि पन दावि लो लो सिरियि नेरमल द्राव लो लो ।।

ममतायि हुन्द मल कर चु दूर समतायि हुन्द बन चु कोस्तूर
शब्द ओम नॉल्य त्रावु लो लो सिरियि नेरमल द्राव लो लो ।।

ब्रह्म कुकिलन सुत्य सुत्य ह्यथ प्रालब्धक्य फल फूल ख्यथ

गोवेदु गू गाव लो लो सिरियि नेरमल द्राव लो लो ।।

नेरुने रेतुकाँलिस मंज बेयि आनंदु आँलिस मंज

यूग न्यँदरा त्राव लो लो सिरियि नेरमल द्राव लो लो ।।

राग त्राव फेर वनुनुय मंज सत संग सथ ज़नमन मंज

हनसु पखु वुफुनावु लो लो सिरियि नेरमल द्राव लो लो ।।

ज़ीवात्मा पर्मात्मा वेस्तारु बागु त्यागु लक्षना

ज़ीवु बावु मनसावु लो लो सिरियि नेरमल द्राव लो लो ।।

फेरु वेष्णो मंज चमनन फोल गुलशन बुलबुल चु बन

च्यथ विकासस आव लो लो सिरियि नेरमल द्राव लो लो ।।

०००००००

चानि बरु तल प्रारुया

शामु स्वन्दरो चॉन्य छम कल चानि बरु तल प्रारुयो
त्रेह तु न्यँदुर छम नु अख पल चानि बरु तल प्रारुयो ॥

छेस बु रिवान नज़रु दिवान कथ मकानस ब्यूठहम
दुरदानो चूरि मो चल चानि बरु तल प्रारुयो ॥

त्रेशि हँच छेस तचि तावे प्रेमु नागस प्यठ नितम
चावुनावतम अमरेतुक ज़ल चानि बरु तल प्रारुयो ॥

आयिसय शर्ण रटुहय चरण छेस बु हरन शकु सुत्य
कुस कर्यम मे मुशकिलन हल चानि बरु तल प्रारुयो ॥

सालेग्रामो सालु यितुमो पोशि पूज़ा करुयो
पूजायि लागय बेल तु मादल चानि बरु तल प्रारुयो ॥

गूपियव वोनहम छे शामा शामु लालस ज़्यादु टॉठ
चोलुख त्रॉविथ क्युथ कोरुथ छल चानि बरु तल प्रारुयो ॥

हाय बोम्बरो शामु रंग छुय दिल चै संग छुय दिलबरो
बुरु वॅरथस लोलु यॅम्बरजल चानि बुरु तल प्रारुयो ॥

कल छम चॉन्य जल च़ु यितुमा मनि मनस मंज सावुथो
वथरुन करय लोलु मखमल चानि बुरु तल प्रारुयो ॥

रुक्षमणी छय तम्बुलेमुच़ वरनि शेषिपाल मा यियम
खस रथस प्यठ वात जल जल चानि बुरु तल प्रारुयो ॥

वेषु दास छुय नाद लायान आदन बाजे यूर्य व्वलो
वादु सारो वादु मो डल चानि बुरु तल प्रारुयो ॥

००००००

नंदु गोर्युन आँगन

वैलिवि सँखियव गछव क्रष्णस नंदु गोर्युन आँगन

कृष्ण डींशिथ ख्वश गछान मन नंदु गोर्युन आँगन ।।

सॉरी दिवता तोर छि लारान अँस्य वुछिहोन नारायण

जसदा छि मुकट शेरान नंदु गोर्युन आँगन ।।

अँस्य ति सॉरी ललुनावोन लोलु बालुक मन वुछिहोन

म्वख स्वंदर ज़न सिरी चमकान नंदु गोर्युन आँगन ।।

आसि मा सुय युस छु त्रिभवन व्वपदावान तु पालन

पालि ज़गतस तु गालि राख्यसन नंदु गोर्युन आँगन ।।

द्रायि सारेय गूर्य बाये सुत्य प्रेम तु माये

द्वदु नारि वारि वारि सोम्बरन नंदु गोर्युन आँगन ।।

नंदु गोर्युन आयि सॉरी ल्वकट्य बँड्य नर तु नॉरी

गूर्य बालक छालु मारन नंदु गोर्युन आँगन ।।

नंदु गूर जसदायि वखनन अँस्य ति हय अँस्य यी यछान

बाशि कॅर्य कॅर्य छु मनमोहन नंदु गोर्युन आँगन ।।

जसदा छेस द्वद चावान म्वखु म्वखु अँसस वुछान

बाल कृष्णस आयि ज़ामन नंदु गोर्युन आँगन ।।

द्वद शुर ऑस मुचुरावन जसदायि वारु हावान
म्वख्रु हनि मंज्र वुछुन त्रिभवन नंदु गोर्युन आँगन ।।

आयि साँरी लोलु मंदरन आर्ती तु पूजा करान
दुप दीप कोफूर ज़ालान नंदु गोर्युन आँगन ।।

मथरायि मंज्र बूज कनसन गोकुल वासुदेवन
वातुनोवमुत छुख्र म्योन दुश्मन नंदु गोर्युन आँगन ।।
तस गँछिथ्र वोन नारद जियन ब्रॉर आसि स्व फांगान
वारु बोज़ चारु छाँड वुनिक्थन नंदु गोर्युन आँगन ।।

येलि यिछ्र शेछ्र बूज कनसन मरुन बूज़िथ्य छि थर अचान

शोक प्रावन तु त्रावन ख्यन नंदु गोर्युन आँगन ।।

तान्य वोननस पूतनाये म्यानि मटि कॉम आये

ज़िंदु त्रावन नु यि छुम प्रण नंदु गोर्युन आँगन ।।

द्रायि पूतना तु आयि गोकुल वुछतु क्या कोर तमि छल

ज़हरु द्वद बालकस चावन नंदु गोर्युन आँगन ।।

द्वद चावनि लँज स्व कृष्णस द्वद शुरिस ब्रॉटय छु ह्यस

दाम द्युतनस ताम प्राणन नंदु गोर्युन आँगन ।।

तस पतु वोत गोर लूबन छु चोटमुत बिचोर

मंदु ब्वद छा सेद सपदन नंदु गोर्युन आँगन ।।

मोकृ म्यूलस यी ओस यछान जूल मंजु सुय निमन

कनसस ब्रोंह कनि त्रावन नंदु गोर्युन आँगन ।।

बालकन ओस ब्रोंठुय ज़ोनमुत गोर कमि पुछि छु आमुत

बेछि ब्रहमुन हेछिनावन नंदु गोर्युन आँगन ।

वोथ बालक होट रोटनस मूल प्यठय ज़ेव चॅटनस

द्वद मोथुनस रतु प्राचन नंदु गोर्युन आँगन ।।

जसदायि ड्चूठ दॅदस्योमुत गोर वेसमरु छु गोमुत

द्वद शुर्य लोग सु तावजन नंदु गोर्युन आँगन ।।

येलि ह्यॅच करुन्य ख्वखुज कृष्णन जसदा वुछ्य वुछ्य तोशान

मॉज पतु पतु दोरि लारन नंदु गोर्युन आँगन ।।

आसु द्वद गूर्य बायि लारान बालु खेल कृष्णनि वुछान

ब्रोंठु कनि रॅटिथ त्रिभवन नंदु गोर्युन आँगन ।।

बालु लीला वॅन्य वेषिणन बालु कृष्णुन बचपन

करि दर्शुन परि पूर्ण नंदु गोर्युन आँगन ।।

०००००

करुन गछि पॉन्य पानस जय

बनुन आज़ाद ज़पख निनर्य करुन गछि पॉन्य पानस जय
कॅरिथ बॅखती च़े मुखती छय करुन गछि पॉन्य पानस जय ॥

बु हरसू बुछि तसुंदुय रूप विवेकय नोन प्रज़लावु दूप
तॅमिस रुस बुछ छेमा कांह शय करुन गछि पॉन्य पानस जय ॥

च़ेथुय नोन शीश युस छुय चोन विद्यवानव ग्यानुवानव ज़ोन
करुन निर्मल तु कासुस खय करुन गछि पॉन्य पानस जय ॥

च़ेतुक गुर वारु पक़नावुन दॅछिन्य खोवुर्य मु बुछिनावुन
वेच़ारुकि कोचि त्रावुस हय करुन गछि पॉन्य पानस जय ॥

सिलाह सामान युद्वेश गन्ड दिवान गछ सर्व विश्यन डंड
स्व गॅयि निष्काम कर्मच क्रय करुन गछि पॉन्य पानस जय ॥

प्रमाद आलुछ पथर त्राँविथ उदखरगुक्य जामु पॉरॉविथ
चु कर संकल्प चूरस खेय करुन गछि पॉन्य पानस जय ॥

रटुन मोह राज दिस गरदन छु दॅर्ययूदन चु बन अरज़ुन
मनुक बहादुर बनख निर्भय करुन गछि पॉन्य पानस जय ॥

शॅतुर गॉलिथ चु म्यॅतरन मंज़ कर संयोग हरशुक संज़
लबख विश्राम सदग्वरनुय करुन गछि पॉन्य पानस जय ॥

यि ज़ानुन छुय स्यठा मुश्किल यि गव संयोगुकुय मॅज़िल

यि गव निर्वान थानुक भय करुन गछि पॉन्य पानस जय ।।

रटुन मन ब्वद चैतस कुन गछ बु सू-हम-सू अंद कुन गछ
अचय तस सुत्य सॅन्य चैथ करय करुन गछि पॉन्य पानस जय ।।

स्वरुन सतचित आनंदुय लबख तेलि पर्म आनंदुय
स्व आनंद तथ अंदर गछि लय करुन गछि पॉन्य पानस जय ।।

हतो वेष्णो मॅ गछ दिलगीर पोरु कर्मक यि छुय तॉसीर
पनुन्य कर ब्वद टोटयि दय करुन गछि पॉन्य पानस जय ।।

०००००

प्राताकाल आव मे ति अन तु गाश मति

प्राताकाल आव मे ति अन तु गाश मति

छम चॉन्य आश मति पूरन कर ॥

लटि म्वख हावतम मोहगटि कर नाश मति

छम चॉन्य आश मति पूरन कर ॥

जन्माति जन्मन ग्यूर आम फेरान

छुस हालि हॉरान डेंशथ कर

जल हाव म्वख पनुन छुम नु बरदास मति

छम चॉन्य आश मति पूरन कर ॥

बॅखित् बावु सुत्यन वति चानि नेरव

कति छुख आसान पॉगाम सोज़

नतु दि पनुनुय प्रोन यादाश मति

छम चॉन्य आश मति पूरन कर ॥

मोह गटि मंज़ छुस वथ छम नु यिवान

सत ग्वरु हावतम सतुची वथ

वथ हाव नोन त्राव सूर्य प्रकाश मति
छम चॉन्य आश मति पूरन कर ॥

हनि हनि फ्यूरुस ह्यथ मनि कामन
शहरन तु गामन कति आसि यार
छुख पाताल किनु छुख आकाश मति
छम चॉन्य आश मति पूरन कर ॥

निरवासन वनतु कति चोन आसन
अंधकार कासतम वंदुयो प्राण
करतम स्यदुवानिन्य हिश बाश मति
छम चॉन्य आश मति पूरन कर ॥

कल्पनायि रोसतुय कलु हो वंदुयो
कलि चानि रॉवुम न्यँदुर तु नेह
वलु व्वन्य वेष्णस ञलि अबिलाश मति
छम चॉन्य आश मति पूरन कर ॥

दयालो बोज़ फॅर्ययाद

ही दयि बोज़ म्यॉन्य लोलु नाद

दयालो बोज़ फॅर्ययाद

यिथि दूखु मंज़ु कर मे आज़ाद

दयालो बोज़ फॅर्ययाद ॥

यि छु संसार ब्रम तु बॉज़्यगार

अन्त ज़ोनस नु कौंसि अँक्य

ज़्यूठ सँदराह बेशुमार

तार ज़ोनस नु कौंसि अँक्य

यथ नु अंत आसि तथ कति आद

दयालो बोज़ फॅर्ययाद ॥

मोह आवलुन्य फाटुनोवनस

छरटु छरठ करुनोवनस

गोस बाँबुरि थरु थरु छम

नरि ज़ंगु वायिनोवनस

वाँत्य लगनस दिन विवयुक पाद

दयालो बोज़ पॅर्ययाद ॥

देहु इन्दरि तिछि प्रनॉमी

मन छु युंहदुय स्वॉमी

अथ मनस पतु पतु दोरान

स्व छि बोज़ बॅड खॉमी

संकल्पन हुन्द छुस उपाद

दयालो बोज़ पॅर्ययाद ॥

चानि आशायि च़ेय कुन आस

छ़रटु छ़रठ संकट मे कास

छुस चोन दास पेयिनय पास

हृदयस मंज कर मे वास

ग्यानु अँगनु ज़ाल म्यॉन्य अप्राद

दयालो बोज़ पॅर्ययाद ॥

संकल्पन तु विकल्पन सुत्य गव म्योन वतर्न

लूभन मधन कोर चंचल म्योन मन

विवयिकि नो मे शिल वासन

चूरि नियिहम मे हन हन

होश डालन छुम मे प्रमाद
दयालो बोझ पॅर्ययाद ॥
यसुन्द नेथ आसि संचेथ मन
सुय ज़न गव सत ज़न
श्रन्यन मंज ति छि वखनन
मे छु वोनमुत व्यासन
सुय छु तफ ज़फ सुय छु ज़माद
दयालो बोझ पॅर्ययाद ॥

आसि करुन अज़पा ज़फ
धारनायि मंज त्राव डाफ
अना किनु दूर कोरमुत
संसारुक संन्ताफ

छुस नु शुमार छुस नु तेदाद
दयालो बोझ पॅर्ययाद ॥

हे दयालो दिह त्यागु विज़ि
सन्बख मे पानु रूज़ि जि
वृथ म्योन पज़ि रज़ि सुत्य

थँव्य ज़्यन समादानुय
दुर्बल छुम पानु युन याद
दयालो बोज़ फॅर्ययाद ।।
निर्वान पद दितु वेष्णस
चावतन विग्यानु रस
रोज़ि अंदकनि शेहजारस
मन कामनायि चॅठतस
हरिदयस मंज़ रटि चॉन्य पाद
दयालो बोज़ फॅर्ययाद ।।

०००००

ही दयि बोज़ कनय च़ेय रुस कस वनय

ही दयि बोज़ कनय च़ेय रुस कस बु वनय

करुयो अर्रचनय च़ेय रुस कस बु वनय ॥

संसार आवलुनुय यि छु सनि खोतु सोनुय

अथ मंज़ आस हेनय च़ेय रुस कस बु वनय ॥

चोवनस मोह मसुय रूदुम नु द्यान हेसुय

रोवमुत गोस छेनय च़ेय रुस कस बु वनय ॥

हरुम मे कष्ट हन हन हरीहर छुख थवुम कन

आचर आलवनय च़ेय रुस कस बु वनय ॥

सुखश्म निर्मल करुम वृम प्रत्यक्ष पॉठयन

सूत्य ग्यानु लोचनय च़ेय रुस कस बु वनय ॥

चितस करुम पूर अग्यानु मल गछयम दूर

हे टाठि निरंजनय च़ेय रुस कस बु वनय ॥

पादन तल बु मरय चॉन्य अस्तुती करय
वारु वारु आर अनय च़ेय रुस कस बु वनय ।।

वासनायव नालु रोटहस संकल्पव बु च़ोटहस
कोरुहस पनुपनय च़ेय रुस कस बु वनय ।।

वेष्णु थवतन समादान च़ल्यस देवु दिह्य अभिमान
मंगन छुय शनुशनय च़ेय रुस कस बु वनय ।।

०००००

अनुग्रेह चानि बेमार बलु लो लो

ही दयालो छुस बु चंचल लो लो
अनुग्रेह चानि बेमार बलु लो लो ।।

कर्म हीन छुस आमुत संसारस
चद छोन छुस लोगमुत वेवुहारस
अविद्यायि हुंज छम गांगलु लो लो
अनुग्रेह चानि बेमार बलु लो लो ।।

लाय विशीप बेयि सुत्य छम आवरन
मल खोतमुत छुम अनतःकरण
विवेक बो पालु पान छलु लो लो
अनुग्रेह चानि बेमार बलु लो लो ।।

जॉन्य जॉन्य ति नो जॉह ज़ोनमख च्य
ज़ान दिम तिछ जॉनिथ ती गलि दुय
दिम निष्यय युथ नु जॉह डलु लो लो
अनुग्रेह चानि बेमार बलु लो लो ।।

छुस बू लोगमुत संसार सौर्यसुय मंज
रोवमुत छुस पनुनिस गरुसुय मंज
द्यानु सुती ज़ाल ग्यानु मशालु लो लो
अनुग्रेह चानि बेमार बलु लो लो । ।

प्योमुत छुस गटि मंज अनतम मे गाश
त्युथ गाश हाव युथ नोन छु सिरियि प्रकाश
कॉफी छम चॉन्य अख वुज़मल लो लो
अनुग्रेह चानि बेमार बलु लो लो । ।

बानु हेनि बो द्रास खानु गदाये
अंगु हीन छुस फेरु कोत जायि जाये
दिम बिक्षा अनुग्रेह खलु लो लो
अनुग्रेह चानि बेमार बलु लो लो । ।

यँम्बरज्वल बोम्बरो छेसय प्रारान
वेरि चाने पान छेस पॉरावान
वनुवन छेस वूँच आरवलु लो लो
अनुग्रेह चानि बेमार बलु लो लो । ।

लोलु बागसु फॅल्युडु गुलु तु गुलुजुलरु
डुशु नूलु अजु वुलु छलु गुलुजुलरु
हुशु डुडु डुथु डुशुडुवरु डुवलु लु लु
अनुगुरेहु डुलु डुडुडुलरु डुलु लु लु । ।

हु वेषुणु डुनुनुडु डुलु जुलुनतुन
डुलुलु जुलुनखु तेलु डुनलु सरतलु सुवन
डुलुतु अँनसु करतु सकलु लु लु
अनुगुरेहु डुलु डुडुडुलरु डुलु लु लु । ।

०००००

शामु वखतन शाम रूढुम

शामु वखतन शाम रूढुम वनतु कुस मनुनावि तस
प्रेम रसकी प्यालु बॅर्यमस वनतु तिम कुस चावि तस ॥

नाव नसा द्योतनम नु बिलकुल क्याजि लोगुन संगदिल
कन थाविहे वीलु वॅन्य वॅन्य वनतु कुस कुमलावि तस
शामु वखतन शाम रूढुम वनतु कुस मनुनावि तस ॥

बागि हुसनस पानु मॉलिख हेस तस निश दूर निन
यस गछेस ख्वश तस छु बखशान हुसनु किन्य जॉहिर सपुन
नाज़नीनन नाज़ वॅर्य वॅर्य वनतु कुस तंबलावि तस
शामु वखतन शाम रूढुम वनतु कुस मनुनावि तस ॥

परदु चॅट्य चॅट्य नेरुहा दरदु नयन फेरुहा
अर्ध रातन प्रथ प्रभातन पान पनुन पॉरुहा
तस छे ज़ाथुय परदु रोयस वनतु कुस मुच़रावि तस
शामु वखतन शाम रूढुम वनतु कुस मनुनावि तस ॥

खया खबर छम दुशमनन वॅम्य म्यानि कनि तस फ्युर यि दिल
लानि क्या ओसुम मे लीखिथ गोछ नु रावुन म्योन शिल
पानु जगतस छु दाय दिनुवुन वनतु कुस समजावि तस
शामु वखतन शाम रूठुम वनतु कुस मनुनावि तस ।।

बालि कर्याम बालु बावय पान अर्पन पानु तस
अज ब लॉजनस लुकु पामन चाख जामन बो दिमस
प्रानि कथु तिम प्रेम बॅर्य बॅर्य याद बेयि कुस पावि तस
शामु वखतन शाम रूठुम वनतु कुस मनुनावि तस ।।

हर दिलस वॉक़ुफ छु पानय कर गछेम वॉक़ुफ दिलस
सरसुय मंज सॉर्यसुय बनु खेलवॅथुर यथ मंज रलस
वन यिथिस रेशन जॅमीरस म्योन दूख छुस ना च़ेतस
शामु वखतन शाम रूठुम वनतु कुस मनुनावि तस ।।

वन्यजि वेशणु दासो तस लामकानस बव सरस
क्या बन्योव तस बे निशानस छु नु यिवान मंज अनबवस

ग्यानु लोचन येलि नु आसन वन तु कुस प्रजुनावि तस
शामु वखतन शाम रूठुम वनतु कुस मनुनावि तस ।।

जीवु सुंद युन गछुन कारण क्या

पानो कोनो छुख पानु वेचारन
जीवु सुंद युन गछुन कारण क्या
नाल क्याजि वोलनय मोह अंधकारन
जीवु सुंद युन गछुन कारण क्या ।।

गरबस मंजु छुख आसान प्रारान
बांदु बांदु मंजु म्वकलावेम ना
हे दयि कोनु छुख अवतार दारन
जीवु सुंद युन गछुन कारण क्या ।।

पतु कोनु रूजुय यादावॉरी
वॅर्य वॅर्य वादु इनकाॅरी गोख
द्वदु शुर रोटनख व्वदरुक्क अमारन
जीवु सुंद युन गछुन कारण क्या ।।

मंजुलिस मंज येलि थोवहख सॉविथ

कर्म वादु मॅशरोवुथ हाय

बाशि वॅर्य वॅर्य पाशि जानावारन

ज्जीवु सुंद युन गछुन कारण क्या ।।

डॅब्य ब्वछि मॉज छय क्वछि ललुनावन

छिह वॅर्य वॅर्य असुनावन छय

बेताल हॉविथ थीह छुख दारन

ज्जीवु सुंद युन गछुन कारण क्या ।।

दिह्य यनु प्रोवुथ मरुन मॅशिरोवुथ

मॅशरुन मन गोछ मॅशरुथ मा

संकल्पन छुख पतु पतु लारन

ज्जीवु सुंद युन गछुन कारण क्या ।।

कथ वॅर्य वॅर्य छुय तोतु बोलुनावन

बालकन सुत्य खेलनावन छुय
बालकन सुत्यन छालु छुख मारन
जीवु सुंद युन गछुन कारण क्या ।।

पाठशाला त्रॉविथ पान पॉरावन
ह्योछमुत गाटु खरचावन छुख
द्वह गॅजुरावान नेथुर छारन
जीवु सुंद युन गछुन कारण क्या ।।

द्वह पाँशि रोटनख दिह्य अभिमानन
पनुनुय पान बोड़ मानन छुख
पकवुन्यन नावन दकु छुख मारन
जीवु सुंद युन गछुन कारण क्या ।।

खया करु यिय छुख गरि गरि बावन
गरि मॅशरावन हरु सुंद नाव
खरु सुंद्य पॉठ्य छुख मटि बोर सारन
जीवु सुंद युन गछुन कारण क्या ।।

पकवुनि पानु छुख ज़ोर थेकनावन
दक सुत्य गेल पकनावान छुख
हरु हरु मॅशरिथ गरु छुख संवारन
ज़ीवु सुंद युन गछुन कारण क्या ।।

बुजरस मंज़ रावीय तदबीर सौरुय
कथ करनस मा च़े वॉरी दिन
दपुनय शूब छे नु चान्यन कारन
ज़ीवु सुंद युन गछुन कारण क्या ।।

विदबावु ब्द छे नु सॉलिम रोज़ान
दरमुच विद छे नु सपदान स्यद
छ्योटय् श्रूच्य् रोटनख खोट्य आचारन
ज़ीवु सुंद युन गछुन कारण क्या ।।

थकनस चॉनिस काँह छु नु ज़ानान
डखि रोस बेहनस मा यिवान वार
तम कॅड्य कॅड्य छुख दम संदारन
ज़ीवु सुंद युन गछुन कारण क्या ।।

हृदि समयि शरीर कोब आसि गोमुत

गोब आसि गोमुत पनुनुय बार

मोह पुच्छि पेटरन शानु छुख दारन

जीवु सुंद युन गछुन कारण क्या ।।

वेणु दासो वुछ येम्य संसारन

सारिनुय छुख थोवमुत ललनावुन

वाँस गुज्जोरिथ छु अफसूस लारन

जीवु सुंद युन गछुन कारण क्या ।।

मनन कोरनम पागल पन

सौर्य सौर्य पानो केह छुम नु बनन

मनन कोरनम पागल पन

गरि खोत्तु गरि छुम अफलास अनन

मनन कोरनम पागल पन ।।

संतोशस प्यठ जाँह छु नु पलन

चलान बियाबानन प्यठ

पॅठ्य पॅठ्य छु नेरान रॅट्य रॅट्य बु अनन

मनन कोरनम पागल पन ।।

अँन्य पॉठ्य छु नेरान वँन्य दिनि वतन

छेनन तु हॉसिल नु यिवान कैह

फेरान जहानस पानस नु सनन

मनन कोरनम पागल पन ।।

नमन दग छम लमन लमन

छम्बन तु छारन फिरनोवनस

वासनायि हुंज रज जाँह छम नु छेनन

मनन कोरनम पागल पन ।।

पादाशुक रेण नखु छुम वालुन

येम्य सुन्द दकु दौल च़ालुन छुम

त्रेथ छुम व्वमन खत छुम छेनन

मनन कोरनम पागल पन ।।

वेष्णु दासु येम्य करु कलपन

दिहकि अभिमानु दँरुरोवनस

दिह आव छ्वकन जुशाना गनन

मनन कोरनम पागल पन ।।

मूर्ख मनु म्यानि कथ बोज़ख ना

मूर्ख मनु म्यानि कथ बोज़ख ना

संतोश दारि प्यठ रोज़ख ना

वेष्णु म्वलुज कथ याद थावख ना

संतोश दारि प्यठ रोज़ख ना ।।

संसार छु क्वस क्वस बॉज़्य हावान

गहि छु करुनावान स्वनु सुन्द वान

गहि छु कृनुनावान हारि काह काह

संतोश दारि प्यठ रोज़ख ना ।।

बगय बूगिथ कांह छु नु त्रफ

आशा दारिथ हांगनु खफ

सेकि ज़ल बासान मृगु त्रशणा

संतोश दारि प्यठ रोज़ख ना ।।

पापु करमन छु दंड धर्मस शय

प्राकरमुक्य बूग बूगनावय
तैथ्य पदस नाव कर्मु लीखा
संतोश दारि प्यठ रोज़ख ना ।।

सार छु नु रोज़ान गरु तु परिवार
ल्वकचार सूरिथ छे बुजरस ति लार
क्याज़ि छुख चु दारान करुआसना
संतोश दारि प्यठ रोज़ख ना

काल चॅमरॉव्य तु ब्रोंठय च़म
अज़ ताम आमृत्य वीर कम कम
हॉव्यमृत्य सुह दम रोज़ान छा
संतोश दारि प्यठ रोज़ख ना ।।

सॉर छे नु रोज़ान यि टॉठ काया
अज़ ताम सुत्य कौंसि निमुच़ छा
सार गछि ज़ानुन परमात्मा
संतोश दारि प्यठ रोज़ख ना ।।

बॉय बंद तु बेनि ज्ञान चंद बांदव
चंद सूर अंद रूद फीशिथ ज़ेव
वंदुचे तुरि हारु वुशनेर छा
संतोश दारि प्यठ रोज़ख ना ।।

वाख

वुदय लागुहा सॉर्यसुय कालस

विद करुहान पनुन पान
प्रोद गछुहा कालस अकालस
अदु कालस खोचुहा नु ज़ाँह ।।

यिय लीखिथ आसि कपालस
बेतालस वन खोचुन क्या
थफ दिज़ि तस दामानस
लामकानस वाति नु काँह

होस ज़न गंडुहोन मसवालस
कुनि कालस बंद सपन्या
ग्रटु क़न्य ज़न खसि पांचालस
डुलु गछुनस तौर लग्यसा
मँतिस खिदरस बेयि कंगालस
मंज़ सालस तिमन त्रपती छा
साँरी प्रुछान मँहलु किस सालस
बे खालस दियि कुस क्या

रुम येलि आसि दिलु किस प्यालस

कलु वालस तखसीर क्या

वनो वेष्णो बे मिसालस

तस दयालस दया छा

हिंसाफल

प्रथम करु आदि दीवस बो नमस्कार
गच्छय्म संत्वष्ट दियम वनुनस मे व्यस्तार
तॅमिस रुस करु नु ताक्रथ कैह ति वनुनस
बु तॅम्य सुंजी इछाये शोकु ओनुनस
त्रोगुन माया तसुंजुय माया छय
रछान पालान करि व्वन्य सौर्यसुय क्षय
रजोगनु रुपु जगतस छुय बनावान
सतोगन रुपु त्यथ कर व्वन्य छु पालान
तिमव ग्वनु रुपु वॅर व्वन्य सौर्यसुय लय
प्रपंचस कारणन वॉतिथ यिहय छय
त्रिकारण यिम छि तिम अॅम्यसुय छि ज़ामत्य
रॅछिथ संसार अॅम्यसुय मंज छुप्योमुत
छु पानय शिव- शक्ति पानु अवतार
बिहिथ अंद कुन करान संसारु व्यवहार
यिहॉय लक्ष्मी बिहिथ ज़गतस अंदर छय
करान सौरुय ज़गथ अॅम्यसुय छु जय जय
मे वात्यम तस करुन ग्वडु पादि प्रणाम

छि येमि किन्त्य सर्व शक्ति बेयि परम दाम

करुन्य छम प्रार्थना ग्वडुन्यथ यिहॉय मे
तम्युक व्यस्तार सेद करि व्वन्य यिहय मे

अहिंसा भावु यॅच लूबस अंदर गव

तमी परमात्मा कूपस अंदर गव

यि वुछ्यतव ब्रहमनन क्या ओस दोस्तूर

पनुन ब्रहमन धरुम पालुन बदोस्तूर

दया संतोश गोछ आसुन प्रथम अंग

तु त्राँविथ कूद लूबस सुत्य थव संग

यि कोड़ कलियोग राजन हुकुम शॉही

क्वकर्मन बल द्युतुन दर्मुच तबॉही

यशन रॅट्चमुत्य छि अँस्य बूज़न बनावन

पशन गाथा कॅरिथ अज़मथ छि हावान

छु अनि राजस करुन लॉज़िम नमस्कार

छु येमिकिन्त्य सारिनुय प्राणन रक्षाकार

करान छु परदु तथ प्यठ सॉर्यसुय युस

हवन म्यॅट थोद तुलुन्य वेस्तार गछि युन

नेन्यन हुन्द ठान कोरमुत तल छु च्योलमुत

छु यिथु पॉठ्य मागु छाये सिरियि वोलमुत
वुछिव क्युथ ह्युव लुकव संतोश पोलुख
सफेद पोशन गरीबन ब्योल गोलुख
विद्धी पूर्वक करान ऑस्य प्रॉन्य बूजन
दरान वृथ एकु हारय माग नावन
मलुन्य असि ब्बदगॅमुचु वुछ क्या छु कारण
खेवान अँस्य अन छ्योट कैह नु व्यचारन
समय तबदील गव प्रकृथ छेटेमुचु
सत्या योगुच श्रद्धा सॉरुय मिटेमुचु
वुछान छु नु काँह ति मावस छा पुनिम छा
खेवान मामस छि ग्रेहनस स्व कति काह
शुर्यन हुंघ पॉठ्य रछान छिरु पूत्य सॉरी
बड्यन व्वचबन खेवान छिख मॉर्य मॉरी
ब्रह्म नष्ट छि यिम तिम्य अनन दिवताहन
नेन्यन पुछ करान छि कटन हुन्द हवन
श्रुती दिथ तोतुय वातुनावान कटस
छि निष्यय बड्गवान यँजमन कटस
छु आश्वर यिमन किथु छु मन पचान
छि अथ ज़ीवु हिंसायि राख्यस यछान

छे हिंसा तिमन ग्वन अम्यान गोट
छे ग्यानस तु द्यानस करान वारु गोट
दपान असुर ब्द अँमिस बोज़नाव
न्यथ आहार मामस छु तमिकुय स्वबाव
अनान गोर पंडिथ वुछान तिम छि साथ
छु कर ठीख नक्षतर करव ज़ीवु गाथ
दपान छिय कटस कुन पषव थव चु कन
गछख मूक्षदामस प्रसन थव चु मन
छँली पाफ साँरी च़ली शाफ बोज़
च़ोलुय युन गछुन गछ चरण जीव रोज़
यि शेछ बूज़ कटन ह्योतुन होशव डलुन
सूरिथ रथ ह्योतुन रज़ हेथुय पथ च़लुन
दोपुन ईशरस गछान छुम कनन
अमी कार्णु मे यिम रँटिथ छा अनन
मे ऑस आश आयास ख्योनुय आसि फल
यि सोरुय यिमव दुरज़नव कोरुम छल
यिमन छा करुन खश सँहल कैह कटस
मे ओस वोतमुत पोज़ यिमन छुस अटस
खेयाम गासु नीर्यन च़ेयाम नँदियि ज़ल

अमि हाचि करनम मे अडुचेंट्य वदल
यि गव त्रेशि गासस प्यठ मे युथ हाल
मे आहार करि युस तॅमिस क्या मिसाल
वुछिथ येरु पानस द्युतुन दरु तॅम्य
नयोतुख होश पानस अॅनिथ हूर तॅम्य
कर्म छिम पनन्य यिथ्य यिमन क्या कोसूर
शरीरुक वहरुम यिय छु योत युन ज़ोरुर
दोपुन गोरस हतो गोरव यि मो वन
वुछिम मे श्राक थर चायम मे प्राणन
कनस तल छुख वनान कपट्च कहॉनी
मरुन यस आसि तस चा शाद मॉनी
मरुन बूजिथ कलन कोस्तूर तोतय
द्वखव मंज़ु द्वख छु कुस अमि मरनु खोतय
मरुन बूजिथ बड्यन वीरन अचान थर
मरुन बोड द्वख मरुन सारिनुय बयंकर
मरुन छा काँह होवुर सालु सोजुन
दिनस द्दु प्यालु आशिर्वाद बोजुन
यि म्वकलोवुन वॅनिथ लोग करनि वेलाफ
ति ज़ान्याव तॅम्य गछ्यख ना काँह ति इनसाफ

दोपुन पषि बावु किन्य येलि मॉज बोऽय्यम
स्व आस्यम नीरि तति कम बाकु सोऽय्यम
तॅमिस आस्यम खबर छुम नीर्य छावन
ति मा ज़ोनुन तसुन्द रथ वाति कावन
वन्यम कुस तस सबुर कर बर मु काँह शोक
अॅमिस पषि बावु निश मीज अटल मूक्ष
यि म्वकलोवुन वॅनिथ प्यव गव अशस सुत्य
हेतिहस प्राण दी दी खशस सुत्य
थॅवुहस लथ कलस बृकुनाँव्यहस दंद
चोट्टहस होट तु वॉनी तस सपुज बंद
दपान येलि बूज गबि गबि ज़ादु मोरुख
कॅरिथ खश प्यठ कुलिस इस्तादु त्रोवुख
मनस मंज याद तसुंज छे छालु पावन
हरनि लॅज ओश थदि नालु त्रावन
व्वलो ल्वकचारु पॉठ्यन खेलुनावथ
पकुम सुत्य सुत्य कम कम नीर्य ख्यावथ
वोनुन गबि तस वन यि क्या सना बॅनिथ आम
थ्यकथ वखतस यि क्युथ वोतुम मे पॉगाम
यि बूजिथ ईशवरस कुन कोरुन पॅर्ययाद

मे क्या तकसीर ओसुम गव मे बेदाद
गँयस ज़ेव कँज तु गोबरस लँज दिने नाद
ति प्यव तस ल्वकचारुक दृदु दाम चोन याद
पोथुर छुय तारवुन येरिलूक परिलूक
मँ ऑसिन कॉसि प्रालब्द पोतरु सुन्द शोक
दिचुन क्रख लँज वनुनि हा ईशवरो बोज़
वनय शठ बोलि मंज़ तथ कन थँविथ रोज़
यि क्वसु वेद गँयि पानस अश बेयिस खश
करुन पशि खून सुत्यन दीवता ख्वश
यछान सॉरी अमा कर वाति हेरथ
लूकन हेरथ कटन क्युत आसि हॉरथ
यिवान छिख ज़ामतुर्य ग्वडु कठ छि मारान
सु यँजमन दूशि दंड़ मा छुय व्यचारान
तिमन गव ख्योन तु चोन छुख ज़ामतुर्य साल
कटन वात्या करुन शमशेरि गुरबाल
यिमन आसन छु टाठ्यन ज़नमुकुय दिन
करान पुन्य दान रथ ग्वडुन्यथ कटन ह्यन
बरान शॉदी छि तिम पशि खूनसुय प्यठ
वुछिव खशि विज़ि पोश कॉत्या दिवान छूरठ

रँटिथ नरि ज़ंगु अँमिस येलि ज़ोर पावान

सु मारन वोल पनुन वीरुत छु हावान

ख्यवान मॉरिथ कटन अमि दूह बरान स्वख

तँमिस कटु माजि मा जिगरस लगान छ्वख

असुन्द उपकार करान छुस यिछ दगॉई

यिथिस उपकारसुय युस करि बे व्वफॉई

दपान कटु मॉज बटु मॉल द्रायि बे आर

गछन पापन अंदर पानय गिरिफतार

वुछिव मरनुच निवान मा काँह ति शंखा

दपान परि लोक न्यँतरव काँसि ड्यूँठा

छु येलि सिरियि ति तु ब्रह्म वँवी जीव

यि कस जीवस अंदर छु नु आत्मा दीव ।।

करय लीला हरी हरु पानु बोजुम

करुम आज़ाद सहायक पानु रोज़ुम

यिमन पशि बावु फँर्ययादन

हरी हरु कोनु थोवथम कन

मे गव बेदाद छेस नालन
हरी हरु कोनु थोवथम कन ।।

गॅयस पशि बावु ग्यानस मंज
लॅजिस मुहु बाँद्य वानस मंज
करान छेस बोग पोरु कर्मन
हरी हरु कोनु थोवथम कन ।।

चजायस हरनुन्यव छालव
रॅटुस संकल्पु क्यव शापव
डॅजिस वथ रावुराँवुम लूबन
हरी हरु कोनु थोवथम कन ।।

विशेरस छुम मे मॅचरावान
बियाबानन अंदर फिरुनावान
डोलुम ह्यस छुम नु जनमन छ्यन
हरी हरु कोनु थोवथम कन ।।

वैरुय कूदन स्यठा अबतर
मुहुक्य रूदन मे चॉनिम थर
गँयस पथ वथ मे छम दूरन
हरी हरु कोनु थोवथम कन ।।

कुनुय संतोशिकुय संतान
रँटिथ न्यूहम तु छस गिरियान
गँयम बिरियानु हनि हनि तन
हरी हरु कोनु थोवथम कन ।।

दिलस यस आसि लोगमुत नार
स्व क्या ज्ञानी दिलुक सब्जार
स्व क्या मंगि साहिबु शादन
हरी हरु कोनु थोवथम कन ।।

पशान छेस लूकु हुन्द व्यवहार
पशन मा कैह वननस वार
पशन छेस छुम स्यठा फेरन
हरी हरु कोनु थोवथम कन ।।

वेष्णु दासन अहिंसा बाव
कोरुन पानस प्यटुय व्यखनाव
चॅटिथ लूबस मे शोमरोव मन
हरी हर कोनु थोवथम कन ।।

यि म्वकलोलुन वॅनिथ पेयि गश तस आव
बुछिव दयि कार वनु मंजु छावुला द्राव
वनस मंज वास करवुन्य सुह तु हापत
यि प्योस सोजुन असुंदि व्वपदेशि बापथ
दोपुस तॅम्य कर चु छ्वपु व्वन्य बोज थव कन
वनय इतिहास पनुनुय प्रोन हन हन
पोरु ज़न्मस अंदर ओसुस बु ब्रहमुन
द्वहस रातस करान वेदुक तरपन
नेचुव ओसुम कुनुय ज़ामुत वनय क्या
स्यठा रूगी गोमुत ओर ओस नु ज़ांह
सु हरदुक तूरि फल ज़न क्वलि प्योमुत ओस
चेवान ओस माजि द्वद ज़न रॅय गोमुत ओस
मे डम्बि पुछि ज़्यादु तॅम्य सुंज माय ओसुम

कर्यम सेवा बुद्धिथ स्वय राय ऑसुम
तसुंदि पुच्छि गोस कृत्यन व्यद्धवानन
प्रुछान गोरन तु पॅडितन वेद खानन
दोपुम गोरव करुस कौदूरि जल जल
यियेस ताकथ लग्यस मद हँस्य सुन्द बल
कौदूरि छुथु बूजमुत ज़ांह कथ वनान छि
व्यचौरिथ तिम क्रुहुन छावुल अनान छि
वॅरिथ खश तस ब जलदी बस्तु वालन
विदी पूवर्क शुरिस तमि मँज्य निकालन
वुछिव मोह क्युथ करान येलि अुह छु संतान
दपान छुस बब अहँस वंदस पनुन पान
मे ऑसुम आश आस्यम मे दीर्गु आयू
करुन आस्यम श्तायू तय गतायू
कॅरुम कौदूरि वुछिव क्या बॅनिथ आम
य्वहय पाफ धर्म राजन लोद मे इलज़ाम
सपुन समयया तु तमि पतु प्राण त्रॉविम
कोरुम पॅश्य गाथ कम कम नरक पेत्रॉविम
द्युतुख मे पॅज्य ज़न्म क्रेछर स्यठा प्योम
कोरुम येलि पाफ मा ज़ोनुम यि क्या गोम

गिंदान शुर्य बावु पौज ओसुस वनस मंज
सु छावुल्य खश स्वरान ओसुस मनस मंज
वनान ओसुस धरुम राजस नु तखसीर
कोरुम पॅश्य गाथ पापस यी छु तौसीर
करुम कृत त्युथ वनस मंज येलि मे हेलि द्राव
अचानक पौठ्य पॅज्य वोला तोतुय आव
रॅटिथ न्यूनस खॅटिथ थोवनस गरस मंज
पगाह ह्योतनम करुन हेछिनावनुक संज
रटान ओसुम चटान ओसुम लठ्यव सुत्य
कोरुम येलि पाफ वुछ संताप वुछिम कृत्य
हेछिथ फिरनोवनस नॅगरन तु देशन
वुछिव क्युथ द्वख द्युतुम छावुल्य कलेजन
सपुन समया वोतुस तथ गरस बो
वुछिथ परिवार तु त्रय प्योस स्वरस बो
ग्वडुन्य पॅज्य वोला डाबुर ओस वायान
ति ओसुस तति ख्वश करान दातु बयान
दिचुन क्रख वाति माल्युन बखतु हॉरी
वुछिथ पॅज्य नरामु दार्यव द्रायि सॉरी
वुछिम येलि शुर्य पनुन्य मे शरुम आयम

बिहित गोस हारु टूप्य वॉलिथ थव्यायम
ति ज्ञान्याम छुस येमि दारुक ग्रहस्त दार
न्वशन कोर्यन अंदर नचनस मे छा वार
वुछिथ बुथ म्योन यिमन ओसुय बिहन तार
अगर प्रज्ञनावनम करनम मे दिक्कार
शुर्यव वुछहस बेहान चोनुख असनवान
ति वुछ पॅज्य वॉल्य तस गव ज्यादु ओमान
तॅमिस गव क्रूद कलस मे लोयनम टास
त्यांगिथ पॅज्य दिह्य दुबारु गुर बॅनिथ आस
जन्म गुर्य सुन्द वुछिव क्या ओस कारण
ह्योतुस तिलवॉन्य छिम तील सारान
स्व छावल्य बस्तु खसु गोरस ऑस मे दिचमुच
गॅछिथ तिलवॉन्य मॅल्य ऑस ह्यँचमुच
स्यठा समयस कुलिस प्यठ ऑस डोलान
कॅरिथ पयमानु तमि सुत्य तील तोलान
बनॉवुख तथ तगुल लॅजहम गुन्डिस प्यठ
बोरुख तथ तील मिलनोवहम मे संकट
यिवान ऑसिम निवान ऑसिम चकस तल
तुलुम येलि ज्यादु संकट गोस निर्बल

स्यठा समयस तिमव येलि बोर सोरुम
छोकिथ येलि गोस न्यॉतरव खून होरुम
वोदुम वाराह तु दीवन दोर अवतार
पोरू जन्मुक नेचुव सपनुम खरीदार
ह्योतुस तॅम् मॅल्य तु ह्यथ न्यूनस बखानय
खोतुम येलि लोलु सान दार्यस मे शानय
करान ओसुस खोशी वुछ्य वुछ्य सु संतान
स्वरान ओसुस अँदुर्य किन्य यँच खँचुम हान
खसान ऑसिम गछान ओसुस स्यठा ख्वश
कदापी त्रय कदापी कूर या न्वश
बहन वॅरियन शुर्यव रोछहस ज़बर पॉठ्य
मे ऑसिम हठ ह्यँचहम तिमव हॉट्य
ब्व येलि वृद गोस दँविथ ओसुस नु ज्ञानान
ब्व दवुहा पोज़ मुदव ओसुम मे शानन
गँयख रुश त्रोवहस कोरहम विसरजन
ति ज़ोनुख कुस दियस बिह्य बिह्य दृहस खेन
रेतन तारन डलस ओसुस बु फेरान
गँमुच नॅव लय शुर्यन हुन्द नोव मे फेरान
खेदा आयम द्रमन मूलन दिच्याम दंद

फुटुम दंद वोतमुत ल्वकचार कस अंद
दपान ओसुस अमा क्या सना यिनम मा
लॅजिम सरदी वंदस व्वन्य गरु निनम ना
प्योम येति शोर करुन ह्योतुम शुर्यन वाद
ति गव शडु बोलि मंज़ लायुन गुरिस नाद
मे ज़ोनुम छुख दिलस मंज़ म्योन म्वहबथ
निनम गरु देव अंदर कुन स्वय गॅयम सथ
ति ज़ोनुम वुन्य मकॉय खेन्य मे आस्यम
खबर मा छम पॅतिम हिश व्वन्य मे मा छम
यि सूंचिथ पानु गोसख आंगनस मंज़
तिमव ह्योतमुत करुन ख्रव नेरनुक संज़
गॅडिथ सामानु थोवमुत डेरु डफरुक
मे मा रफतार हॉबथ च़ाम सफरुक
दिचुम हिन्य डेडि अचुवुन ख्वश गछन ना
खबर ऑसुम दिनम अरदाबु सेरा
सु कति अरदाबु बांदन डेरु डींठिम
मोटुम अरदाबु च़ापुन दंद मे बीठिम
वुछिथ छावुल्य बचस मे कथ पशुन ओस
दिवान छूरठ मे यिवान शानन कशुन ओस

वैष्णव स्वसराय मुदवस येलि बोर ड्युतुम
मे कोत ओसुम गछुन छावुल्य खयालस
गछुन मा ओस पानस सालु कालस
खेनुचि आशायि आयोस केह ति मा ख्योम
पैतिम व्यवहार सोरुय नवि चेतस प्योम
सोरुम येलि प्रानि जन्मच खानदोरी
सोम्बर्यमृत्य चीज वनि आयम मे साँरी
मे वोनमुत गरु वह्युक त्रुयि ती मे सन्योमुत
येछिथ काँछिथ गॅछिथ सीखा मे ओनमुत
वुछिथ सीकस वनान तिम शुर्य छि आसन
यि ओनमुत मॅल्य छु काकन स्वर्गवासन
यि बूजिथुय हॉवनख तमि नॅन्य पनुन्य माय
बबस वैक्वठसुय मंज ओसिनव जाय
सु ओसुम गरु वह्युक कोत गोम हय हाय
सु आस्यम स्वर्गलूकस छुस नु परवाय
यि कथ बूजिथ मे किथ्य अनतः करण दॅद्य
थवान सामानु स्वर्गुक छिम मे लॅद्य लद्य
वॅनिख कोन्दूरि पोतरन मसलहथ ठीख
तुलुन स्युन बुजनु बापथ काकुनुय सीख

मे लोदुहम डेरु पेट कुन तौर क्वस ऑस
शुर्यन सुत्यन पकान ओसुस बु तोशान
मगर ग्वबि बारय वदनस छुस नु पोशान
खुरिस प्यठ खुर वुछ्यतव थेंच तिमन मॉज
लगन ओसुम दोगुन लोदनम नेचिव बोझ
दोपुन तस कुन खस ह्योर कुन गछ्यस क्या
त्रे रेथ वॉतिम बिहिथ फिलु छु गोत छा
खेंचुम येलि त्रय तु न्यंतरन गाश ह्यव आम
केंरुम तमि खूर तानन वाश हुव द्राम
वुछिव मुह गटि कम्युक मे बोश ओसुम
खेंसिथ मेय त्रय पनुन्य बर दोश ऑसुम
तमि गरि ज़न मे प्रोवुम स्वर्गुकुय दार
नशस मंज़ वथ वुछिन्य रूदुम नु व्यस्तार
व्वतल बुजि मंज़ फोटुस रूदुम नु रफतार
तिमन गव कूद प्यठय द्युतहम स्यठा मार
हतख गव तस शुर्यव कोरहम मखोलय
व्यचोरुन मा गुरय लोगमुत छु दोलय
असान दोपनख हतो बॅकवो अंसिव मो
तसंज़ त्रय छस युस ओस मशिल बरज़ो

खसन असनस सु लारान ज़न शिकारन
चटान वथ पथ करान ओस शाहसवारन
अगर ज़न प्राण नेरनस ब्वन बु वसुसा
अंगन चोखुर करस तंग नो बु कसुसा
दिवान क्रख ज़ोर ओसुम खोरि वायान
तु हावान शहसवोरी लूक बायन
कनस क्रख दिचुन क्या शाम प्योसा
तनुक अरदाबु ख्योन अज़ गॉब गोसा
मे मा वृद बावु किन्य कैह ओस ताकथ
कड़ान अख लथ ब्वडान ओसुम दोयिम लथ
बु येलि तति तुरि सुत्यन नीम शाँत्योस
मे तल गव डेर डेरस पानु प्यठ प्योस
तु येलि तसली गुरिस खसुनुक तैमिस गव
फिरुन बुथ पोत तु नेचिविस कोरुन आलव
चु म्वकलाव थाल पगाह यिनु नेरि पँद्य साल
शुर्यन दफ युथ नु कचि पूतिस नियिवु शाल
पेयख बाम्बर दोपुख गवडु डेरु वालव
गँयख अनिगट सु कचि पूत न्यूख शालव
पोरु ज़न्मुच यिहय गँयि कर्म खेती

हेतिख मे प्राणशेश्तर सीकृ सुती
वुछिव पॅश्य गाथ करनुक फल मे क्या तुल
तिज्जिथ गुर्य दिह्य बनोवहस नोव बु छावुल
द्वखन प्यठ द्वख तुलिम कृत्याह छि क्या कथ
ह्योतुस मॅल्य ब्रहमनन कौदूरि बापथ
यि ब्रहमुन सुय येमिस ग्वडु ओस पॅश्य बाव
वुछिथ मंदुछोस व्वन्य मा कर्यम पॅतिम ग्राव
अगर ज्वन आसि तस सुय प्रज्जुनाव्यम
दकव दोलव क्रकव सुत्य लरज्जुनाव्यम
ओनुन खशि वोल सुत्यन बेयि पठित गोर
विद्धी पूर्वक ग्वडुन्य हेतिहम छलुन्य खोर
छेलिथ येलि खोर ह्योतुम अँदरी व्यचारुन
मृत्युक मनत्र पॅरिथ आसख बु मारुन
असुन त्रोवुम पनुन करतव चैतस प्योम
जु दिह्य त्रॉविथ त्रेयिम नोव खश मे प्रखट्योम
वुछिथ ब्रहमुन तु यज्जमन खश करन वोल
वनुनि लॅग्य अख अँकिस पॅश्य सुन्द यि छु नु कोल
दरीं संसार यि छु नु असि बूज्जमुत ज्जांह
असुन पॅश्य सुन्द यि वुछ अज्ज नोव तमाशाह

यि छु नु छावुल असुर छा दीवता छा
बॅनिथ छावुल करनि आमुत परीक्षा
अगर आसि दीवता शापुक छु वसवास
असुर येलि आसि तेलि करि सारिनय ग्रास
तिमन मॅठ श्राख तु कति मनत्र सु कति बोग
प्रछनि लॅग्य गुल्य गॅडिथ पज़र वन दया कर
छुखा काँह दीवता या आसुर छुखा नर
छे मा अग्यानु किन्य असि ज्ञानुच ज्ञान
तमी ओस असि करुन नेचिविस चुगल दान
मे वोनमख प्रोन दूख कथ नोव वनुन छुम
मे बूगुन ताथि यि कर्तव पनुन छुम
तिमव दोपहम दयस पथ वन पोजुय वन
असन वखतन चु क्या ओसुख व्यचारान
मे वोनमख योरु फीरिथ हालो अवहाल
करुन पॅश्य गाथ तम्युक फल ताबद यखाल
दोपुम तस क्या प्रछुन छुय मॅ कर तॉर
कथव मंज़ु क्या गरज़ गोरस गछी चेर
यि बूज़िथ मारनस कति ओनुख ताकथ
अॅनिथ छुनहस वनस मंज़ हॉवहम वथ

यि बूज़िथ त्रेशिवनी लोग ज़न दिलस दाग
त्रेयव तरफव त्रे ज़ँन्य चँल्य आख वॉराग
करान शालन सुहन सुत्य बु छुस वास
स्वरान छुस दय तु मरनुक छुम नु वसवास
मे तनु प्यठु वोत फेरान यथ वनस मंज़
गँयम वेलाप चॉन्य अज़ कनस मंज़
यि मुह मनसाव च़ेतस मंज़ थव दयि नाव
दियी दर्शुन सु पानय गछु च़ु अज़ुमाव
यि वुछ कृचाह वुछिम संतान सेवा
ति गव बोज़ुन च़े पानय बो वनय क्या
यि येलि छावल्य पनुन होवुस दृश्यंत
स्व ऑस मोह नारु दँज़मुच़ गँयि ज़रा शाँत
दोपुस तमि तोरु फीरिथ कर च़ल्यम द्वख
मे चंचल मन छु गोमुत छुम नु काँह स्वख
यि मन फिरवान छुम बालन तु छालन
नँनिस मंज़ युथ छु दीपस वाव डालन
संगरमालन तु बालन प्यठ निवान छुम
खँसिथ आकाशि प्यठ दब ब्वन दिवान छुम
दोपुस तँम्य मन करुन कोबू छु दुशवार

अँमिस निश गँयि बँड्य बँड्य वीर लाचार
यि छुय होस बंद करुन मस वाल सुती
अँमिस निश गँयि थँकिथ बलुवीर कुती
रटुन मन छुय चटुन मिजगानु सुत्य क्वह
मनुन शीलन गछुन मुश्किल छु यकसू
यि मन सारिनुय छु हरनुनि छालु द्यावान
करान मूहित छु बँड्य बँड्य साँग हावान
यि मन छु आँकलन बेकुल बनावान
शुरिस यिथु पाँठ्य बोड छुय शीशि हावान
मे छुम व्वन्य बूजमुत अथ यी छे य्वखती
करुन्य बँखती यिहय छे वीदु वेखती
तीज्जिथ मोह गछु शर्ण नारायणस कुन
बंदन त्राव कर चु कूशिश म्वकलनस कुन
यि येलि तमि बूज सोरुय ग्यानु निर्नय
मरुन मँशरिथ शरन नारायणस गँयि
दोपुस छावुल्य पनुन आँब छु नु छुपावुन
थवुन तल कुन बेयन हुन्द याद पावुन
युथुय हाल गव तँमिस ब्रहमन कन्याये
लँबिथ य्वसु शूदरन वनु मंजु अन्याये ।।

ब्रह्मन कन्या

वुछिव कस माजि मॉलिस ऑस ज़ामुच्च
तिमन क्या ज़ान कमि बापथ छि आमुच्च
वुछान तस लोलु न्यत्रव ऑस्य सॉरी
पेयख पेत्रन्य यिहय गॅयि ज़ेन्य कुमॉरि
छे पॅज कथ कूर ज़ेन्य दुर्गथ छि आसान
छे पेत्रन्य ज़िदु योतामथ छि आसान

जेवान येलि कूर करुन गछि त्राहि त्राहे
अमा काँह चारु मा बगवान यछाये
वुछिथ तस कुन गछान यँच मोहस आँस्य
करान आँही तँमिस रातस दूहस आँस्य
वुछिथ तस कुन वनान आँस्य दय थँविन सार
अँछव पनुन्यव वुछिहोन असुन्द विवाह कार
वुछिव रछिनुक तिमव क्युथ प्रोव पतु फल
दुखुक म्वख होवनख मंदुछोवनख क्वल
दपान योवन अवस्था येलि तँमिस आय
शरुम त्राँविथ स्यठा वेचारुने द्राय
सपुन समया कोरुन तमि देशिकुय त्याग
वनस कुन वथ ह्यँचुन ज़न आस वॉराग
लँजिथ गॉमुच तीजिथ माता पिता चँज
वेक्षीपा ह्यथ मनस कथ तावनस लँज
वनस मंज लँज करनि रातस दूहस वास
खेवान फल फूल गुज़रॉविन स्यठा मास
सोरिथ व्वशनि गॉमुच तस बे कररॉरी
दूहस रातस करान आँस आहुज़ॉरी

शिकॉर्या हांगलस पतु पतु दवान ओस
खँटिथ ब्यूदुस मनस मंज़ वेह खेवान ओस
वुछुन येलि सथ गॅयस तस नाद लोयुन
गॅयस गथ ज़न दयस फॅर्ययाद लोयुन
शिकॉर्य येलि बूज़ क्रख अँदरी रोटुन शख
यि मा आसि राक्षसा दॉरिथ स्वन्दर म्वख
दोपुस तमि कोत गछख साथा येत्यथ बेह
तॅमिस गव वारु शख अँदरी होखुस स्नेह
दोपुस तमि क्या मनस मंज़ छुख वेच़ारान
दोपुस तॅम्य हांगलस ओसुस बु लारन
प्रुछुस तॅम्य वेश बदलॉविथ चु क्वसु छख
दयस पथ बोज़ वनुम सौरुय च़ल्यम शख
चु.मा छख वेश बदलॉविथ राक्षस ज़ाथ
खेवान मन्शि मासं करान ज़ीवु गाथ
करान जंगली पशन ओसुस बु गुर्बाल
मे मा ओसुम पानुसुय अज़ वोतमुत काल
दोपुस तमि क्या वनय ब्रहमन कन्या छेस
खसुन्य मे हान लीखिथ ऑस कर्मस
तमी कारण मे बब मॉज त्रॉवुम

तिहुन्द परिवार सौरुय मंदछोवुम

बु कमि बुथि गछु तिमन निश क्या बॅनिथ आम

त्युथ फल मे वोवुख थॅवमख पितुर्य पाम

अगर ज्ञानख मुनॉसिब वर मे पानस

स्वयंवर कर तु निम पनुनिस मकानस

दोपुस तॅम्य बु छुसय जॉती शूदर ज़ाथ

छु म्योन व्यवहार करुन जंगली पश्यन गाथ

चु छख ब्रहमन कन्या ग्वडु कर चु विचार

बदल वरनस अंदर बदलुन छु व्यवहार

यछा येलि छय तु पख म्यॉनिस गरस मंज

पगाह सुबहस करव अदु खांदरुक संज

दोपुस तमि व्वथ गछव गरु मॉन्य छेनु तौर

इजाज़थ कस छु ह्योन नेरव मॅ कर चेर

सपुन रॉज़ी नियन पनुनिस गरस मंज

अमी गरि प्यठु करनि लॅग्य खांदरुक संज

वयन यी तस दयन द्युतनस बराबर

ओनुख परिवार सोम्बरिथ कोरुख खांदर

कॅरिथ खांदर करनि लॅग्य खानदॉरी

समय अवलंगन छु आसान द्यन गुजॉरि

पेवान जंगली पशन वालुन तिमन पोस
यिवान बदबू मगर चालुन तॅमिस ओस
संगस स्वहबथ असर येलि पूर गव तस
शराबा चेथ खेवान ऑस नित्य स्व मामस
क्वसंगु सुत्यन पनुन क्वल मंदुछोवुन
पनुन पान पानु नरकस वातुनोवुन
क्वसंग पॅज्य किन्य छु नरकस मंज जलावान
ज़हर ज़न छी खंडुस मंज तिम रलावान
व्वतमु सुन्द संग छु मन निर्मल बनावान
व्वतमु सुन्द संग छु मुक्ति प्रावुनावान
व्वतमु सुन्द संग छु व्वपदावान सत आचार
यिवान शॉती दिवान भव सागरस तार
व्वतमु सुन्द संग छु पॅज्य किन्य संगि फारस
बनावान स्वन कन्यन बदलिथ विकारस
चंदन कुल छुय आत्मु शॉती थावान
क्वसंग अरुखोल शरीरस छु ज़ालान
क्वसंगु सुत्य ह्योत करुन तमि पशि गाथ
करान मामस बख्यन तस छ्यन नु अख साथ
रटान ऑस चूरि ज़ॉगिथ लूकु हंड्य कठ

करान खश श्राकि सुत्यन या दिवान फ्रुठ
द्वहा अकि गव शूदर जंगल शिकारस
सु ब्यूठ रातस खबर कति गिंदनि ज़ारस
यि पथ कुन रातस ऑस इन्तिज़ारस
ब्यूठ मा मन तॅमिस सातस करारस
थवान सदहन छि कन क्या सना यियम कर
सपुन तसली तॅमिस येलि बंद कोरुन बर
कोरुन सोंचा तु वॅछ गॅयि शराबस
गॅमुच. हॉल मॉल प्योस छावुल्य कबाबस
नशस मंज़ वॅछ दोपुन करु छावुलिस खश
वॅछुस अंदेर वॅछिस प्यठ तमि अन्याव फश
वॅछस चॅज टांग नीरिथ जल न्यबर द्राव
वुछुन येलि पेयि वॅसिथ गश तॅमिस आव
चॅजिस येलि बाख नीरिथ श्राख त्रॉवुन
वुछिव संग दूशिनय कोत वातुनॉवुन
ह्योतुन करतव पनुन अँदरी व्यचारुन
दित्तिन बुथि बुथि ह्योतुन पान मारुन
लोदुन तमि खाक बर सर चाख जामन
यियस वुनरिथ यिहय कथ बूज़ आमन

पेवान युथ संग त्युथ रंग छु हावन
यि कॅर शरमंदु पॅतिम्य ब्रहमन स्वबावन
तु ज़ोनुन छुम गछुन व्वन्य नरक वॉसी
मृतुक सामानु वॉचुस कालु फॉसी
मरन विज़ि गॅयि शरण कारण तम्युक क्या
अकी ज़न्मु नरक बूगुन मे यकजा
चु पापन नरुख बूगुन कथ छि यी सेद
बनॉवुख अँन्य तु रँन्य मोज़ूर मँदालद
येमिस निश आयि ज़न्मस गव तँमिस च़स
थोगुन ह्युव बुथ वँसिथ गॉमुच़ तँमिस नस
न कुनि तस बुथ न कुनि तस अँछ न मस
वुछुस येलि माजि बुथ बुथि गॅयि वोनुन तस
तँमिस ऑस्य रंगु सुत्य गँत्य मिल्य अँछरवाल
वुछिथ ल्युथ गोख बुथ तस ओस वँक्राल
व्वपॉदी सुत्य ऑस तस माजि येलि ज़ाय
अँकिस मीलस तसंज़ दुर्गन्द न्यबर द्राय
वँरिथ नफरथ लूकव तोत युन गछुन त्रोव
स्यठा तंबल्योव तँम्य सुन्द मोल मंदछोव
दोपुन त्रुयि कुन यि निन मेच़ि तल दबावुन

हेकख नय वॅन्य गॅडिथ क्वलि फाटनावुन
खॅजिल बो छुस गोमुत वुछ क्या बॅनिथ आव
दयस ऑस्य अॅस्य मंगान संतान तु शर द्राव
दोपुस त्रुयि तोरु फीरिथ क्या वनान छुख
चु यिथि तकरीरु बुज्जदिल बनान छुख
ग्रहस्तस ट्योठ मोदुर आसान छु चालुन
यि आसि बूगुन ति कस ताकथ छु टालुन
यि आमच सानि मरि या गॅछ नु असि ज़ेन्य
बु किथु कन्य फाटनावन क्वलि गॅडिथ वॅन्य
ब मजबूरी थॅवुन जॉरिस अंदर निथ
खव्डस मंज थॉवुन सॉविथ गासु वथरिथ
दिवान वखतस प्यठ तस दूद गॅछिथ ऑस
दफतु त्रावुन तॅमिस मा स्योद ओस ऑस
ड्वड्स वॅरियस दपान तमि माजि दूद चोव
करनि लॅज त्राहि त्राहि आयि तस ज़ेव
सतन वॅरियन खवड्स मंज रुज्ज यकजा
वॅरिथ पॅश्य गाथ नरुख बूगुन सॅहल छा
खेमत्य तमि गाथ वॅर्य वॅर्य पॅश्य स्यठा ऑस्य
बॅनिथ चर बिच खवड्स मंज यिथ पेमत्य ऑस्य

दिवान ट्वपु तस चैवान रातस द्वहस रथ
तॅमिस अंगुहीनि तुलनस मा छु ताकथ
यि वुछ पादाश यिथु पॉठ्य आयि तस ज़ेव
गछान ज्युस खेथ तॅमिस कोताह ब्वछर प्यव
दोपुन तस माजि व्वन्य आयी च़े सखती
दिहम कोताह मे खेय्य खेय्य छम नु त्रफती
मे गव व्वन्य पानु मंगनस नीम ताकथ
नियम कुस सड़कि प्यठ स्वय छम रफाकथ
तु येलि तमि कोरि तोरय मॉज समझॉव
गनीमथ ज़ोन तमि निथ सड़कि प्यठ त्रॉव
हेवान ऑस वतु गतन इनसाफ अँन्य अँन्य
दिवान छेट्य ल्वकमु निथ ऑसिस तिमय खेन्य
वुछिथ संकट दुखिथ वॅरमुच़ स्व रूगन
अंगन छस दग पॅतिम पादाश बूगुन
बिहिथ रातस द्वहस वति प्यठ वदान ऑस
गछान च़खि पॅत्यम्यन फेले बदन ऑस
स्व नरकुनि यावनुच़ येलि तस अवद डॅज
बुजर नरकस ह्यारतुन युन यात्रा लॅज
गछान यात्री करान पूजा शिवालस

कॅरिथ अर्चन मंगान शुभ फल अकालस
वुछिथ तिम यात्री ऑस नालु त्रावान
पछ्यन वेशनार्पन छु नु काँह दिवान अन
वुछिथ तिम यात्री तॅम्य सुन्द सु सन्ताफ
करनि लॅग्य त्राहि त्राहि आख इनसाफ
दोपुख तस क्या बनी यिथु कन्य तोतुय नेर
शिवालस प्यठ अगर वातख गछुख सेर
तत्यथ आसान छि लूख बूजन बनावान
श्राद्धालू बावु किन्य खुंदरन छि ख्यावान
अनचि आशायि तोर कुन वथ हेने लॅज
कोरुन हल बल तु छल डुलगॅन्य दिने लॅज
तुलिथ संकट शिवालस वॉच नजदीख
सपुन्य येलि ख्वश तु लूकन लॅज मंगनि बीख
वुछिव खेय्य खेय्य तॅमिस त्रफती यिवान मा
ब्वछर प्योमुत तॅमिस मंगनुक गोमुत प्राह
दिवान लुख तस नॅवीद स्वय ब्राद ऑसुस
द्युतुस अँक्य बेल पॅतर सुय लोदुन ऑसस
द्युतुन तथ चुह लॅजिस कुह आयि तस दर्वख
सपुन्य कूदी बजूदी लॉय तमि थ्वख

स्वय थ्वख लायायि तमि पनुनिस कपालस
वुछिव दयि गथ स्व बीठ स्योद शिवालस
येम्य येम्य वुछ तस तस खोत स्यठा कूद
वॅरिथ कनि कनि थ्वकन हुन्द वोलुहस रुद
वुछिव लूकव तसुन्द दूख मा वेचोरुख
तॅमिस अंगु हीनि किथु पॉठ्य दूश खोलुख
करुन देहकार ह्योतहोस वारि वारे
स्यठा शरमंदुगी गॅयि तस बिचारे
करनि देहकार पनुनिस अथु शरस लॅज
शरण गॅयि यिय वनुनि करुनाकरस लॅज
चु छुख दयालू मे गव अथु शर दया कर
हरी हर च़ेय दपान छी छुख शिव शंकर
मे ऑसिम पाफ तुलुम कोताह मे संताफ
मगर नवि सरु मे मा ज़ॉनिथ कोरुम पाफ
पॅतिम नरकुन मे व्वन्य सोरनि लजाव बल
मे मा ऑसुम खबर कैह नोव गछेम छल
हरे शम्भू लगय पम्पोश पादन
छेस अर्पन चु थवतम गोश नादन

स्यठा संकठ तुलुम आमच शरण छस

हरे शंभू चे कुन लीला करन छस

चुय वन कुस दया करि शम्भू

पाफ हर ही हरी हरु शम्भू ॥

कर्म पुछि येलि आयस जन्मस

हॉन्य मे लीखिथ आंस कर्मस

जायस ब्रहमन गरि शम्भू

पाफ हर ही हरी हरु शम्भू ॥

बालु बावु द्रायस नादौनी

सुय गोम मालिन्यन ओमौनी

लंग्य वनुनि क्याजि गॅयि वरि शम्भू

पाफ हर ही हरी हरु शम्भू ॥

मालिन्युक परिवार मंदुछेवुम

वेश बदलोवुम देश त्रौवुम

कति ग्वफु कति रंगु लरि शम्भू

पाफ हर ही हरी हरु शम्भू ॥

रातस रूजस कनिनुय तल
खेन कया ओसुम जंगली फल
पाप देहु दव्व कोनु ज़रु शम्भू
पाफ हर ही हरी हरु शम्भू ॥

पादाशि पुचि रूदुम नु यादाश
ब्रोंठ कुन ति प्रखटयोम गोम अकलि नाश
नतु कति मे शूदर वरि शम्भू
पाफ हर ही हरी हरु शम्भू ॥

संग दूशि सुत्यन गॅयस संगदिल
धर्मुक वेचार रूदुम नु बिलकुल
ज़ीव गाथ कोरुम गरि गरि शम्भू
पाफ हर ही हरी हरु शम्भू ॥

येम्य आसि ज़ॉनिथ कोरमुत पाफ
धर्मु राज़ु तस कति करि इनसाफ
कर्मचि गरि कोनु डरि शम्भू

पाफ हर ही हरी हरु शम्भू ॥

कृति कर्मन हुन्द बदलु ह्योतहम

बूगुन नरकुन रुग द्युतहम

आयस वेशयानि मरि शम्भू

पाफ हर ही हरी हरु शम्भू ॥

बूगुनि नरकस त्रॉवहस ख्वड

तति ऑस्य वथरिथ बिच तय च़ड

सॉवहस तॅथ्य मंज़ लरि शम्भू

पाफ हर ही हरी हरु शम्भू ॥

आश छम मे करतम नाश पापन

ऑर्चर आलवन थवतम कन

न्नतु क्या छे कथु म्यानि छरि शम्भू

पाफ हर ही हरी हरु शम्भू ॥

यादाश म्योन क्या करि गॉरज़ान

लानि क्या ओसुम ज़ानि म्योन पान

यस युथ द्वख गुजरि शम्भू
पाफ हर ही हरी हरु शम्भू ॥

युस नु येति ज़ाँह ति दरि दान चोनुय
सुय बनि हंगु मंगु अंगु ह्युनुय
वैतार नदी कति तरि शम्भू
पाफ हर ही हरी हरु शम्भू ॥

यस नु रोजि वेचार जन्मस यिथ
वेशनार्पन थवि नु केंछा दिथ
तोत गेंछिथ पतु क्या करि शम्भू
पाफ हर ही हरी हरु शम्भू ॥

ही रक्षाकारु म्यानि रक्षपालो
म्वक्लावतम नरकुनि ज़ालो
शर छुम बु आलवय नरि शम्भू
पाफ हर ही हरी हरु शम्भू ॥

अरजा करि व्वन्य वेष्णो दास

दासन हुन्दुय करतम मे पास
नाश कर नरकुनि थरि शम्भू'
पाफ हर ही हरी हरु शम्भू ॥

फुटुस येलि मन जुरुम कोरुन यकबाल
यि गुजर्योमुत तॅमिस ओस बेदीन हाल
वॅरिथ लीला स्व न्यॅत्रव खून हारान
हरी हर, कोनु छुख मे द्वख निवारान ॥

शरण गछनस वुछिव क्युथ फल छु आसान
हरी हर तस तमी गरि व्याद कासान
शिवालस निश कन्यन प्यठ पान छोवुन
हरी शम्भू पॅरिथ तमि प्राण त्रॉविन
वनय क्या अथ यि शोहरथ फीर आमस
स्व अँन्य छेति पोशि सुत्य गॅयि मूक्ष दामस
वॅर पूजा शिवस तमि होशि सुती
गछ्या संतुष्ट शम्भू छेति पोशि सुती
न तस खसि दूश न मेल्यस काँह अशुभ फल
शरण गछनन स्व म्वकलॉव वॅरिथ होसल

यि येलि छावुल्य स्व गॅब तति बोऒुनॉवुन
अँनिन होशस तु पॅश्य ब्वद त्रावुनॉवुन
पनुन पादाश पशि बावुक स्वरनि लोग
हूरुन ओश ईशरस लीला करनि लोग
कॅरिथ लीला हरी हरु बोऒि ना तस
हरेस ना दुख करेस ना नाश नरकस ।।

वेष्णु राजदान दयि लोलुक ग्वनमाथ

डा० रतन तलाशी

अदबी तवाँरीखन मंज छि तिथ्य ति केँह शॉयिर आसान यिम योदवय गॉर मोरूफ आसान छि अमा पोज युहुन्द कलाम छु अमि बावजूद ति लुकन मंज मकबूल आसान सपुदमुत। युथुय अख शॉयिर छु वेष्णु राजदान। हालांकि वेष्णु राजदानस गॅयि नु वुनि पंचाह वॅरी ति गुजरेमतिस् मगर अँहुंज शॉयिरानु शखसियत छे नु अँहदि कलामुचि मकबूलियँच हिंसाबु तीच व्यँज यीच यि आसुन्य गॅछ। शायद अमि सबु जि ओहुन्द बेशतर कलामु ओस वुन्युस ताम अछोपुय, येमि सबु यि संजीदु कॉर्ययन ताम वॉतिथ ह्योक नु।

वेष्णु राजदानुन अलु पलु सोरुय कलामु छु सानि शॉयिरी हुंजन दून रेवायचन लोर। अख रेवायथ छे हबु खोतूनि तु रोसुल मीरुन्य मुजॉदी शॉयिरी हुंज रेवायथ तु दोयिम दयि बँखती तु दयि लोलुच प्रॉन्य शारु रेवायथ। याने कुलस प्यठ छे अँहुंज शॉयिरी अशिके हँकीकी तु अँशिके मजॉजी क्यन दून मेहवरन अँद्य अँद्य। बाजे छु यि महज तवमीद तु बाजे तवसी। ओहुन्द बेशतर कलामु छु लीलायन, नजमन तु लोलु बॉतन प्यठ मुशतँमिल। हयती ल्याहजु छु केँह बयानु या नजमु ओकतरफ त्रॉविथ यि वचनुकुय शॉयिर। हालांकि केँचन वचनन मंज छु कुनि कुनि गजलुक रंग ति खोतमुत। अमा पोज बासान छु जि सु छु नु शऊरी तोर गजल पाननावान। गजल ह्युव ऑसिथ ति छु युहुन्द लबो लहजि तु मिजाजु वचनस नखु।

अँहद्यन वचनन मंज छि अख दरजन पेठी पहन तिम वचन शॉमिल यिमन मंज मजॉजी लोलुच बावथ सपुजमुच छे तु यिमन मंज हिजरुच छरट छरट तु वसलुच मनि कामन ग्रायि मारान छे। यिमन वचनन मंज छु आशक पानु शॉयिर तु माशोक्र

मिसौली। अँहदिस माशोकु संज फितरथ छे नु बेशतर लोल शॉयिरन हुंदिस माशोकस बिदून। याने सु ति छु हँसीन, हिसास, संग दिल तु शोख मगर बे परवा तु दिल शिकन। सु छु नुन्द खो ति तु गहे बे व्फा तु मुनतज़िर थावन वोल। मगर अमि बावजूद ति छु यि आशक़ सुन्द मनु पोच़ आदनु बोज तु सु छु तस वरॉय पानस ना मुकमल मानान।

लोल छु वेष्णु राजदानस निश यिछि शॉयिरी हुन्द मरकज़ तु दिल। यि लोल छु तस निश तरज़ि ज़िंदगी ति तु ज़िंदगी हुन्द मकसद ति। बाज़े छु यि लोल स्व सूरथ प्रावान युस अज़लु प्यठय इनसानस ज़िंदगी सुत्य रिशतु रलावान छु। तवय छु शॉयिर हुसनस प्यठ फिदा सपदनुय पनुन नजाथ ज़ानान। वनान छु:-

मारु मत्यो मो रोज़ जुदा

जान करय फिदा व्वलो

वीलु वँनिनय वेष्णय दासन

छुख नु दिलस गुबार, कासन

करमु लान्युक खुर कुस छु कासन

अमलि पनुने दवा व्वलो

मगर अलमिया छु यि ज़ि न छु हुसुन पोशिवुन तु न लोल रोज़वुन। वखतु किस हालि मॉदानस मंज़ छि दूशवय गॉर महफूज़। तवय छु अकसर लोल शॉयिरन हुंद्य पॉठ्य तस निश ति जवॉनी रावनुक तु यावुन सोरनुक एहसास। वखतुच यि बे सबॉती छे तस महमूद गॉमयिन्य पॉठ्य पनुनिस हितल तु हांच़ल महबूबस गुलज़ारन तु गुलिस्तानन मंज़ दीदार हावनु बापथ दँल्य रटुनावान तु गहे रोसुल मीरुन्य पॉठ्य तसुंदि दिलकश हुसनुक हज़ नतुलनु बापथ बुथि प्यठु निकाब तुलनु बापथ जसतु खॉज़ी करुनावान।

पनुन्यन लोल वचनन मंज़ छु वेष्णु राजदान रोसुल मीरनि दँस्य मुताँसिर बासान। सु छु नु मीरु सुन्द अंदाज़ि बयान तु तशबिह्य क्यो इसतियार वरतावनस ति वायि बरान। यिछि हिशि ज़बॉन्य मूजूब छे बाज़े तसुंज यिछि हिश शॉयिरी पनुनि ज़मान मुकाबलु प्रॉन्य ति बासान। सु छु बाज़े तमगी तु मूसीकियत व्वतलावनु बापथ बाक़ुय लोलु शॉयिरन हुंदि दँस्य ब्रॉहुय वरतावनु आमच़ ज़मीन ति शारु ज़बॉन्य हुन्द कुनि ताज़गी वरॉय करान। येमि सबु अथ मंज़ कुनि कुनि तजरुबुक नव्यर मूजूद छु नु रूदमुत। येति येति तँम्य रेवायतुकि शिठु तकलीदु निश गुरेज़ छु कोरमुत तति तति छु

तसुन्द पूशीदु शॉयिरानु फन जलवु गर सपुदमुत । यिछुन जायन छि तँम्य रेवॉयती बॅरच
पयमानु ति ओक तरफ त्रॉविथ पनुनि मनुच ज़बान वरतॉवमुच मसलन;-

यारु म्याने म्बख हाव जल जल

क्याज़ि रूदुख रँटिथ जंगल

तालि प्यठ छिम तँत्य नारु त्यंगल

जान करय फिदा व्वलो

या

यस आसि अँशकुन बार

सु कोत लारि मदॉनो

व्वन्य गव यिछु शारु मिसालु छे तसुंजि यिछि शॉयिरी मंज कमुय पहन मेलान ।
दरअसल छु नु सु मिज़ाज़न मजाज़ुक शॉयिर । मुमकिन छु जि यि आसि तसुंदि
इबतिदॉई दोरुच शॉयिरी येलि तमि वखतुचि ज़ोरदार मजॉजी शारु लहजि सुत्य
तसुंदिस शारु ज़ोकस ज़ीर लँजमुच आसि, तु यूत यूत वख सोरान गव तसुंजि फनी
सलॉहियँच ति आयि रसु रसु ब्रॉह कुन यिम बँखति शॉयिरी मंज ननि द्रायि । तसुंदिस
तँबियतस ति छे बँखती शॉयिरी बराह बासान । अवय छु सु पनुन्यन लोलु वचनन मंज
ति कुनि कुनि मजाज़ु प्यठ दयि लोलस कुन डाल निवान ।

अँहजि शॉयिरी हुन्द नुमायॉ रंग ति छु य्वहय दयि लोल तु बँखती । अथ
शॉयिरी मंज ति छि ज़ु रंग । अवल न्यरग्वन वॉदी रंग तु दोयिम स्वग्वन बँखति बावुक
रंग । न्यरग्वन वादुच वथ रँटिथ छु सु लल देद तु रवपु भवॉन्य हुंघन कबीलुक्यन
शॉयिरन मंज ति शॉमिल सपुदमुत । तस ति छि ललि हुंघ पॉठ्य इनसॉनी वोजूदस तु
जीवन लीलायि सुत्य वाबस्तु तिम सवाल तँछुन तुलान युहुन्द सैकु जवाब अनका छु ।
तवय छु वनान:-

पानो कोनो छुख पानय सारान

जीवु सुन्द युन गछुन कारन क्या

यि सूच्य सूच्य तु सॅर्य सॅर्य छु सु यथ नतीजस प्यठ वोतमुत जि जीवस तु पजरस दरमियान छु दिह्य अभिमानुक ठोर हॉयिल। तवय छु तस निश येमि संसारुक व्यवहार खाम तु ब्रम दिनु वोला। सु छु तिमव केंचव शॉयिरव मंज्र यस निश जिंदगी हुंदि ख्वखरेरुक तु ना पायिदॉरी हुन्द शदीद एहसास छु। सु छु संसार संसार करनु बजायि वहदतु किस सोदरस मंज्र व्वठ लायिनुक कौयिल, येति पोशवुन स्वख छु । मगर अमि बापत छु पनुनिसुय मनु सोदरस मंज्र डुंग दिथ आत्मु ग्यानच जूर शोलुनावनस प्यठ जोर दिवान। व्वन्य गव यि छु नु महज वननु सुत्य मुमकिन , बॅल्कि छु बकोलि तसुंदि अमि बापथ मन तु हवास वगि रटुन्य तु यि करुन छु नु गफु कथा। यि करान करान क्या छु सपदान ति ज्ञानि वेषुण राजदानुय। वनान छु:-

नमन दग छम लमन लमन छंबन तु छारन फिरनोवनस

वासनायि हुंज्र रज्र ज़ांह छम नु छेनन मनन कोरनम पागल पन

वेषुण राजदान छु पजरस वातनु बापथ ग्यान, करुम, तु यूगस प्यठ ति जोर दिवान। मगर अमि बावजूद ति छे तस निश बॅखति हुंज्र वथ स्पॅज्र तु सहल। तस निश छे बॅखति दुनियिहचि सारेय यछायि त्रॉविथ छरा अॅकिस दयस सुत्य प्रेम थवुन तु तसुंद वसुल यछुन। मगर वसुल ति सपदि तॅस्य यस प्यठ दयि सुंज्र अनुग्रह सपदि। व्वन्य गव दयि अनुग्रह बापथ छु दयि लोल मनि सॅनिरावुन ज़ोरूरी। तु अमि बापत छु आरचर बावसान हरदम दयि सुमरन तु सत संग ति अहम। तस छु यकीन जि तसुंज्र वीलज्रॉरी गछि नु ज़ॉल्य हारि। तवय छु वनान:-

पादन तल बु मरय चॉन्य सत्वताह बु करय

वारु वारु आर अनय च़ेय रोस कस बु वनय

तॅम्य कोर यी तु अदु बोरुन चाव:- .

च़ोल कठु कोश वाव लो लो

सिरियि न्यरमल द्राव लो लो

वेषुण राजदानन पकनॉव परमानन्द नि दॅस्य शोरु करनु आमुच कृष्ण बॅखति ति ब्रॉंह। कृष्ण बॅखति शॉयिरी मंज्र छु ब्रह्म ती यि कृष्ण छु तु तसुन्द ज़ोहूर छु यथ

दुनियहस मंज पनुन्यन बॅखत्यन हुन्द उदार बापथ सपुदमुत। योताम अख बंद अमि पजर निश ला अॅलिम रोजि तोताम रोजि तसुन्द रुह अग्यानस मंज काँद। अमा पोज यि अग्यान हेकि कृष्ण संजि आराधनायि, लोलु तु तसुंदि अनुग्रह सुत्य दूर सपदिथ। यी छु वेष्ण राजदान नि कृष्ण बॅखति हुन्द हर तर ति। दुनियाँयी माया ज़ालु मंजु न्यबर नेरनु बापथ तु मुखती प्रावनु बापथ छु सु ति कृष्ण पादन शरन गछान। अॅम्य छे कृष्ण संजि बालु लीलायि हुंज वखनय बाजे स्येदि स्योद तु बाजे जसदायि हुंज अलामथ वरताँविथ कृष्ण सुंदिस शुर्य बावस तु मोसूमियतस पनुनि मायि तु श्रधायि हुन्द पोशि वरशुन कोरमुत तु कुनि कुनि छुन राधायि हुंघन हिजर वसलु क्यन दूखन तु शादमॉनी हुंज तसवीर काँरी कॅरिथ पनुनिस दरशनु अबिलाशस ज़ेव अॅन्यमुच। वेष्ण राजदानन छु कृष्ण बॅखति बापथ सत संगस प्यठ ज़ोर द्युतमुत। कृष्ण लोलस पोछर दिथ छु सत संग कृष्णस सुत्य तिथय पाँठ्य कुरबत पाँदु करान युथ रासु लीला गूपियन तु कृष्णस दरमियान करान छे।

वेष्ण राजदानन छु जगथ मातायि हुंघन मुखतलिफ रूपन ति लोल बोरमुत। यिछ दीवी बॅक्ति हुंज रेवायथ ति छे नु साँनिस अदबस मंज ज़्यादु प्राँन्य बॅल्कि छे नु यि परमानन्दस निश ति नज़रि गछान। बहर हाल चाहे कृष्ण बॅक्ति छे या दीवी बॅक्ति। अँहेजि बॅक्ति मंज छु शरनागथ बाव तु प्रीती हुन्द जज़ब। अँहदि कलामु तलु छु बासान जि अॅमिस छे आद्यात्म दरशनुच जान ज़ानकाँरी आँसमुच। मसलन तसुंदिस कलामस मंज छे करुम नज़रि यिनुच ज़िकिर। यथ मंज सु त्रेशवुन्य वरगन याने संच्यथ, क्रयमान, तु प्रारब्दु क्यन चॅखरन हुंज ज़िकिर करान छु। तसुंघ किन्य छु त्रेशवुन्य हुन्द फल भुगुन लाबूदी। तवय छु यि निष्काम कर्मन हुंजि साबनि बाजे करमु मल छलनस प्यठ ज़ोर दिवान। युथ मुक्ति या निरवान हाँसिल सपदि। सु छु फिर्य फिर्य निरवानुच कथ करान तु महात्मा बुध सुंदिस निरवानस पसि परदु येमि दूखदाँई ज़िंदगी हुन्द रोल छु अँहजि शाँथिरी मंज ति ज़िंदगी हुन्द सुय र्वख ब्रॉह कुन यिवान। योताम आवा गमनु कि चॅखरु निश पान म्वकलावनुच कथ छि, तोताम छे नु मुक्ति तु निरवानस कांह ति फरख। व्वन्य गव आत्माहुच हँसती ज़ेरि नज़र थाँवित छु निरवान हिंदू मतकि मुक्ति नज़रिया निशि वखरु। मगर बासान छु वेष्ण राजदान छु निरवान लफुज आम मुक्ति हुंदिस तनोजुरस मंज वरतावान।

वेष्णु राजदानन्यन केंचन लीलायन छु नजमि हुन्द ह्युव अनहार । मसलन तिमन लीलायन मंज्र यिमन मंज्र कृष्णु संज्रन बालु लीलायन तु रूहॉनी वति हुंदन पद्यन हुंज वखनय सपुज्रमुच छे । यिमन जायन छु बासान जि राजदान छु शऊरी तोर नज्रम सिनिफ वरतावान । अँहजन मोजूई नज्रमन मंज्र छे “चाय” तु वृद अवसथा अहम तु तवील नज्रमन मंज्र “हिमसा फल” तु “ब्रहमन कन्या” । ग्वडुनिचन दून मंज्र छु तकरारि खयाल । अमि अलावु छु यिमन लडीशहुक ह्युव मिजाजु ति । यिमु नज्रमु छे हावान जि शॉथिरस योदवय रूहॉनियत कि अकॉथिल दुनियिहुच कथ करनस लुतुफ यिवान छु अमा पोज सु छु नु येमि दुनियाचि जिंदगी निश ति बे लाग । “चाय” नज्रम योदवय बुलबुल नागॉम्य सुंदि फनुच हमसरी कॅरिथ हेकि नु, तोति छे यि नज्रम अयाँ करान जि वेष्णु राजदान छु तिमन केंचन कॉशिर्यन शॉथिरन मंज्र शॉमिल यिमन तखलीकी वुतशि बापथ चायि खोस जामि जम नय तु जाम सिफाल ज़ोरुर छु.

“ हिमसाफल” तु “ब्रहमन कन्या”द्वशवय छे मसनवी चालि बहर बंद तु मोजू ति छुख कुनुय । द्वशवन्य हुन्द अंदाज छु मकसदी तु तबलीखी । तु द्वशवन्य बाहम छु अख तसलसुल । योदवय ग्वडुनिचि नज्रमि दौयिमि नज्रमि हुन्द दौयिमि हिसु वनव गलथ गछि नु । द्वशवन्य नज्रमन मंज्र छि द्वयव मुखतलिप कुसव दॅस्य माज्र खोरी बापथ दयि सुंदि तरफु मेलन वालि सज्रहुच तु अजाबुच तसवीर ब्रॉह कुन अननु आमुच । अमि अलावु छे यिमु नज्रमु राजदान न्यन यिमन सूफी खयालन ति ब्रॉह कुन अनान, जि योदवय अख स्यठा पाँपी पुरुश ति दिल फुटिथ दयस शरन गछि तस ति हेकि मुक्ति मीलित ।

यिमन नज्रमन मंज्र छे पनुनि ज्रमानु कि बटु समाजिच तसवीर ब्रॉह कुन यिवान । तिमन दहन छु अकसर प्रथ बँडिस दहस तु परबस प्यठ माज्रमॉरि, खेन चेनुक रेवाज आम ओसमुत । अमि अलावु छि राज्र कठ हिव्य रसूम ति आम आँस्यमुत्य । यिमन प्यठ पषु बली दिनु यिवान आँस. राज्रदान संज्र नज्रमु छे यिमनुय रसमन खलाफ अख एहतिजॉजी आवाज । चिनांचि अथ दोरस मंज्र व्वछु बटु समाजस मंज्र कैह मुनज्रम तु गॉर मुनज्रम तहरीकु युहुन्द मकसद समाज सुधार ओस. अमि अलावु आँस अथ दोरान कॅशीर हिन्दोस्तान क्यन लूकन सुत्य अवाँमी सोथरिस प्यठ ज़्यादु करीब आमुच तु कैह नॅव्य सकाफती तु अँकीदँती त्रायि आसु सॉनिस समाजस मंज्र शॉमिल

सपुञ्जमचु । यिम नज्म ति छे अमी असरुक ऑन । यि जन् यिंहद्यव प्लाटव तलु ति वाजेह सपदान छु ।

कम आसन बावजूद ति छु वेषु राजदानुन कलाम, फन तु फिकरि हुंज स्वंजल तु अँहंज बँक्ति शॉयिरी छे बिला शख अँहंज मजॉजी अँशकचि शॉयिरी मुकाबलु प्वखतु कार फनकॉरी हुंज अकॉसी । यि छु परमानन्दुन्य पॉठ्य तरकीब साज । अँहंज वचन चालि नज्म “ करुन गछि पॉन्य पानस जय ” तु “सिरिपि न्यरमल नोन द्राव ” छे परमानन्दुन्य “अमरनाथ यात्रा” हिश नज्म याद पावान । यिमन तसुदंय पॉठ्य रूहॉनी रमूज आम फहम तु अँद्य पँख्य क्यन मोरूज्जनु हुंद्य दँस्य सकलॉव्यमुत्य छि । राजदान छु कांह खयाल बावनु बदलु मुखतलिफ पैचकरव दँस्य व्वतलावनु आमति सूरतिहालु सुत्य पनुन तजरुबु बावान । मसलन:-

पलन यिवान छा ज़ाह मतरोन

बवान रैगिसतानस छा फल

ज़लस अंदर छा कंह पेवान

बासान छु जि तस छु ललु वाखन हुंद ति जान मुतालु ओसमुत, मसलन:

होस ज़न गंडोन मसवालस कुनि कालस बंद सपन्या

ग्रटु कॅन्य ज़न खसि पांचालस डुलु गछनस तॉर लगिसा

अँहजि. पासु फनकॉरी हुन्द सबूथ छु यि शार:-

रासस अंदर नेथु ननि अचव, नॅचिथ म्वचव कृष्णुय योत

वरि बरि आनन्द करि अथुवासुय सतुसंगकुय विकासुय योत

कृष्णु लोलुच तु अमि महा मिलनुच यिछ पुर शिदथ तु हेसॉव्य तसवीर छे कॉशिरि शॉयिरी मंज खालुय द्रुंठ्य गछान । जिनसी पैयकरु दँस्य हकीकतस सुत्य वसुल सपदनुक यि तजरुबु हेकि अख प्वखतु फनकारुय वरताँविथ । यि पैयकर छु

अकी ऑन बॅहरी ति तु मलसी ति. म्यानि हिसाब छु वेष्णु राजदाननि येमि तखलीकी पोशि गौद्युक “कुलय सर बंद।”

वेष्णु राजदानन्य ज़बान हेकि कुनि कुनि संस्कृत आमैज ऑसिथ। मगर अम्युक वजह छु अँहज़ि शॉयिरी हुन्द फिकरी पसि मनज़र। अमा पोज़ तमि बावजूद ति छु नु अथ ज़बॉन्य मंज़ अँलिमी अ्वब्यर ग्वब्यर हॉवी। दरअसल छु राजदान तजरुबु मुताबिक ज़बान वरतावान। तु अँहज़ि शॉयिरी मंज़ छे नु आम फहम तु महावराँती वरतावुच कमि ति कैह। बाज़े छु नु यि उर्दू लफज़न वरतावनस ति वायि बरान। मगर यिम लफज़ छि तिंहदिस शदतस खलल करान।

बॅखति बावचि शॉयिरी हुंज़ बॅड खूबी छे ज़बुच सदाकथ तु वेशनु राजदानन्य शॉयिरी ति छे नु अमि निश मुछि। अँहज़न लीलायन मंज़ छे नीती, खलूस, इनकिसॉरी, ऑरचर बाव तु आदमु संज़ अज़लु बे कसी तु बे बसी हुन्द जायि जायि इज़हार। अँहज़न लीलायन मंज़ छे कुनि कुनि पुर असर नगमुगी तु यि नगमुगी व्वतलावनु बापथ छु .गाँर शऊरि तोर केंचन शॉयिरानु वलन हुन्द वरताव सपुदमुत। मसलन कुनि कुनि छु ज़ेछन आवाज़न हुन्द यसलु वरतावु सूत्य नगमाँती लहर व्वपदावनु आमुच। मसलन:-

ग्यानु दाता मूक्षदाता छख ज़गथ माता चु छख

ही भवॉनी कर मे वॉनी स्यद म्वखस दिम सरस्वती

अमिचि नगमुगी मंज़ छु अँदरी क्रॉफियि , तजनीस तु तकरारचव खूबियव ति हुर्यर कोरमुत। मसलन अकी लफज़ुक्य यिम मुखतलिफ वरताव वुछिव:-

रामहय गछुहाख रामुय स्वरहाख रामनि रावनु।

चिनांचि कांह कलामु छु नु तोताम मकबूलियत प्रावान योताम नु तथ मंज़ फनकारानु स्नेह आसि। वेष्णु राजदान नि यिमु लीलायि छे नगमुगी, सनुवनि तोसरुक तु ज़बन हुंज़ सदावॅच हुन्द सागर येमि किन्य आम लूकन अथ वठ लायनस लुतुफ यिवान छु।

योदवय नक्राद अमि सागरुक मॅज़ीद मनथन करन शायद नेरन अमि मंज़ु बैयि वारा
म्वलुल्य न्वक्रतु ।

-अंद -